



合刻山海經水經序



夫男子生而桑弧蓬矢天地四方寧非其所
有事乎哉然而甕牖繩樞之子其跬步
曾不越于只尺驟語以通國大都未免蕩
心而駭耳矧曰其晰於窳廓之外而遊覽
遐舉若嚴夫子者流猶曰州有九涉其八
則足臨之所罕到耳目之所隔闕天地之

錦邈四方之采阻舍載籍安稽乎蓋山海
經一十八篇者其為書家古漢光祿大夫
劉秀晉記室叅軍郭璞嘗校定而傳之水
經四十卷作於漢桑欽而後魏鄧道元為
之注撮薈罔博條分脈列庶幾所謂郭象
注莊子延莊子注郭象者也二書之傳久矣
明興合刻稱善本者則始于吳郡黃省曾

氏惜剞劂終緒考訂未遑往、有承魚之
誤友人故鄣吳生瑄謀復刻之金陵延與
江都陸生弼吳郡俞生策後先校讐不遺
餘力其書完好視舊本特甚以向序於不
佞沆余嘉吳生輩用意之勤也而與人之
公也序曰昔者禹抑洪水導山濬川言河
自積石言洛自熊耳其在荒服以外者多

絀而不載延其則壞成賦非服食器用之
良不以登于筐篚抑何約畧而正徑也今
觀二書稱引山川名號源委質諸夏后氏之
書火有廷庭而三足之鳥九尾之羊精衛
燭龍之類迂誕希怪辨名物則為不典考
方輿則為不稽此何以稱焉客曰語有之
少所見多所怪吾聞之騶子中國名曰赤

縣神州中國外如赤縣神州者九於是
有裨海環之廼有火瀛海環其外而釋氏亦
云三千大千恒河沙世界則天地四方寧
有窮乎故吞舟之魚家於水者習焉而聽
者創駭垂天之翼家於山者習焉而聞者
辟易况也高岸為谷深谷為陵人代變遷
靡所底止又惡知夫彼之為可而此之為

不可耶然則二書之作考禎祥周物獲見
遠國異人之謠俗所以為夏后氏翼者也
博雅君子其可忽諸不佞曰唯、莆中
方沆撰

重刻水經序

蓋水經一書黃先生省曾序之詳矣其言
閱肆麗爾大都侈其功用與兩家之宜傳
云爾第校讐未精夾豕時混人非邢邵疇
能取適新安太學吳君絕愛此書志存嘉
惠迺延江都陸君至白下假以歲月窮其
搜剔於是梓匠殫技觀者厥心書成陸君

以屬世懋為之序曰物於天地間最鉅而
最夥者莫如水其於經紀法界浸漑萬靈
功至矣譬之人身津液精血流貫注伏皆
是物也治身者不循其血脉意醫無所席
手治水者不辨其條紀意匠無所施功詎
可無傳述於世今荒度者受成乎子長號
為良史書止河渠蠡測一勺耳後之作者

竟無述焉世所馮依見天地之血脉者系
欽氏一書而已欽書雖多註漏體嚴辭雅
故是作經法也後魏酈道元疏之旁引百
家時發雋語流濕之外贅行紀異博雅之
士倚以為談然經言不典者已經道元多
所刪定今去道元不能千載而余所覩記
源流或蓋何也蓋其說有三焉首楞嚴義

云見水身中與浮幢王刹諸香水海等無
差別是知人之一身從少至老其間枯溢
流壅種種不一水行天地間而欲令千載
一轍乎自魏迄今詎能無變以其解一也
時代陵谷聚落耗登或名在而邑徙或地
是而名非道元所以著薪莽之稱良有意
矣今之郡邑豈盡元氏舊疆即波流不改

而名號已殊安所定為故都繩其繆指此
其解二也河出崑崙傳之載籍尋源勝國
星宿始聞故知身所未經終為貴耳道元
雖稱多歷未便徧行魏疆况澤國在南天
塹見限安能取信行人之口悉諳未見之
都此其解三也然則言在先民鑒惟來哲
好古者尚其奧博經世者貴其變通若謂

書不足馮則負械之尸彭侯之怪何以見
驗于文人若謂書可盡信則禹貢之山川
毛詩之鳥獸草木何以頓殊于今日學者
會而通之足明是書之足傳矣若乃桑欽
立言良史不著其名道元多竒穢史貶過
其實譚藝之士以為遺恨而諸君子能為
表章羽翼傳之通邑大都足使千載而上
靈鬼骨香千載而下文人氣吐詎非方輿
之珍覽寰宇之一快乎吳君名瑄陸君名
弼皆一時嫻于文辭人也

萬曆乙酉端陽月瑯琊王世懋撰

序畢

刻水經序

叙曰水之爲德大矣哉道生天一職統材五發始
西極產毋隅也折赴東墟趨子方也瀝涌昭化妙
之初質流瀾符於穆之神用厚氣肇之升盛露雨
由之感澤象曜資之光朗玄黃本之浮載穹瀨倚
之配密雲漢會之紀戒圖書託之興瑞祗軸寄之
融絡是以寓目者嘆其渾逝臨淵者頌其靈長且
兆類非此無以胚阜萬里非此無以準平醴饗非
此無以烹繕而育年壤墟非此無以灌溉而興穀

法其形勢而樹都廟因其限隔而分州域軸轡與
而窮遐互通堤鑿成而埆瘠咸利鍾匯之區則珠
玉以登枯絕之野則林壑不毛函夏泰和則皇波
達貫坦乎國紀封原割畫則百川斷裂洋然險防
况其精通天步體轄人事海安而知內寧河清而
期聖出徙焉卜廢竭以表亡則代運之隆衰而姓
庶之災吉亦可觀也但卑赴其常決疏爲順平成
之績粲在夏書其宣導也必探夫源首其排入也
必極夫歸納以奠以敷號名俱炳厥後九丘不傳

四嶽埋緼周官存敷浸之畧爾雅開崑崙之端若
司馬遷之載河渠庾仲雍之筆江記偏係一方匪
兼八表况王澤寢消地象俱廢樂廣闢者湮其溝
洫便私謀者壅其湍泉公家醜激巨右改張是以
啓塞靡恒陵谷皆變洪鉅者失其包帶微纖者亂
其營緯紘紘訕訕莫之質竟也已故漢之桑欽特
創此作追法貢體錄爲新經羅併四際總勒一典
凡所引天下之水百三十有七苟非經流不在記
註之限錯陳舊纂以備叅鈎派盡條科以整脉衍

務討異竒同蔚宗之旨趣嚴標郡縣肖班固之鋪
設是乃曠絕之觚翰也然規綱則舉解節未彰迨
於後魏酈道元因景純之濫觴足君長之簡逸以
博洽之弘襟擅圖輿之顓學隨經抒述掇籍弘鋪
剖說十倍於前文揮述半陟其躬履或衆援以明
訛或極辨而較是或哀述以昭邇或廓無而續有
故凡過歷之臯維夾並之坻岸環間之亭郵跨俯
之城陸鎮被之巖嶺迴注之溪谷瀕枕之鄉聚聳
映之臺館建树之碑碣沈淪之基落靡不旁萃曲

收左撫右采豈曰桑欽之詰釋實所以粉飾漏闕
銓次疆隅乃相濟而爲編者也省會又覽古山海
經十八卷亦宇中之通撰也一則主於叙山而水
歸詳綴一則專於紀水而山頗寓列蓋山者水之
根底水者山之委枝故談伊洛者必連熊外語漆
沮者遂及荆岐亦自然之偶屬而不可判離者也
故併合以傳庶好古之賢無粹輯之煩勤爾客謂
二經所記於今矛盾矣其將捨旃可乎予解之曰
子何榆枋之安而螻蛄之拘也其伯益之覽疏猶

之炎農之辨味也桑鄠之括纂猶之姒禹之告成也今卉藥非簞簞之稽案成賦豈驕華之志掌亦將擯本草以詭誕斥禹貢之遠闊可乎况山殊稱目而盤峙之形不眩焉水異分合而就下之情不惑焉粵遡往牒則遠方圖物夏鼎之鑄象也聶耳雕題湯令之備獻也白民黑齒成王之作會也出受八千管仲之蒐揚也殘遺秦柱蕭何之顯布也獵廣窮長王充之嗜信也以至孔疏據之以釋經漢志錄之而麗史齊澄演之而聚書唐典繫之而建部守節屢登於正義應麟富戢於地鈔江淹補之而不能吉甫刪之而頓躋古人崇好文獻足徵苟欲指核希怪狀寫物靈暢探荒極理驗遷圮裁量利害差剖離翕鑒度率吟宅定中外作起民緒咨諏帝采則二經者亦寰內不刊之珍典也嘉靖甲午春二月吳郡黃省曾撰

水經目錄

第一

河水一

第二

河水二

第三

河水三

第四

河水四

第五

河水五

漂水

第六

汾水

澮水

涑水

文水

原公水

洞過水

晉水

湛水

第七

濟水一

第八

濟水二

第九

清水

沁水

淇水

蕩水

洹水

第十

濁漳水

清漳水

第十一

易水

滏水

第十二

聖水

巨馬水

第十三

濕水

第十四

濕餘水

鮑丘水

遼水

淇水

第十五

洛水

第十六

穀水

漆水

沮水

第十七

渭水上

第十八

渭水中

第十九

渭水下

第二十

沽水

濡水

小遼水

甘水

澶水

漾水

丹水

第二十一

汝水

第二十二

潁水

洧水

潁水

澮水

第二十三

陰溝水

汭水

第二十四

睢水

匏子水

汶水

第二十五

泗水

沂水

第二十六

沐水

巨洋水

淄水

汶水

濰水

膠水

第二十七

沔水上

第二十八

沔水中

第二十九

沔水下

潛水

湍水

均水

粉水

白水

泚水

第三十

淮水

第三十一

澧水

渭水

灑水

濯水

瀨水

無水

澗水

第三十二

澆水

蘄水

決水

泚水

泄水

肥水

施水

沮水

漳水

夏水

羌水

涪水

水經
目錄
五
潼水

涔水

第三十三

江水上

第三十四

江水中

第三十五

江水下

第三十六

青衣水

若水

洹水

沫水

延江水

沅酉水

存水

温水

第三十七

淹水

葉榆水

夷水

油水

澧水

沅水

浪水

第三十八

資水

漣水

湘水

灑水

漆水

第三十九

匯水

深水

鍾水

耒水

涖水

漉水

瀏水

瀆水

贛水

廬水

第四十

漸江水

斤江水

水經目錄終

水經第一

漢 桑 欽 撰

後魏 酈 道元 注

明 吳 瑄 校

河水一

崑崙墟在西北

三成爲崑崙丘崑崙說曰崑崙之山三級下曰樊

桐一名板松二曰玄圃一名閼風上曰增城一名

天庭是謂太帝之居

去嵩高五萬里地之中也

禹本紀與此同高誘稱河出崑山伏流地中萬三千里禹導而通之出積石山按山海經自崑崙至積石一千七百四十里自積石出隴西郡至洛準地志可五千餘里又按穆天子傳天子自崑崙山入于宗周乃里西土之數自宗周灑水以西北至于河宗之邦陽紆之山三千有四百里自陽紆西至河首四千里合七千四百里外國圖又云從大晉國正西七萬里得崑崙之墟諸仙居之數說不同道岨且長逕記縣褫水陸路殊徑復不同淺見未聞非所詳究不能不聊述聞見以誌差違也

其高萬一千里

山海經稱方八百里高萬仞郭景純以爲自上二千五百餘里淮南子稱高萬一千里百一十四步二尺六寸

河水

春秋說題辭曰河之爲言荷也荷精分布懷陰引度也釋名曰河下也隨地下處而通流也考異郵曰河者水之氣四瀆之精也所以流化元命苞曰五行始焉萬物之所由生元氣之媵液也管子曰水者地之血氣筋脉之通流者故曰水其具財也

而水最爲大水有大小有遠近水出山而流入海者命曰經水引他水入於大水及海者命曰枝水出於地溝流於大水及於海者又命曰川水也莊子曰秋水時至百川灌河經流之大孝經援神契曰河者水之伯上應天漢新論曰四瀆之源河最高而長從高注下水流激峻故其流急徐幹齊都賦曰川瀆則洪河洋洋發源崑崙九流分遊北朝滄淵驚波沛厲望沫揚奔風俗通曰江淮河濟爲四瀆瀆通也所以通中國垢濁白虎通曰其德著大故稱瀆釋名曰瀆獨也各獨出其所而入海

出其東北陬

山海經曰崑崙墟在西北河水出其東北隅爾雅曰色白所渠并千七百一川色黃物理論曰河色黃者衆川之流蓋濁之也百里一小曲千里一曲一直矣漢大司馬張仲議曰河水濁清澄一石水六斗泥而民競引河溉田今河不通利至三月桃花水至則河決以其噎不洩也禁民勿復引河是黃河兼濁河之名矣述征記曰盟津河津恒濁方江爲狹比淮濟爲闊寒則冰厚數丈冰始合車馬不敢過要須狐行云此物善聽冰下無水乃過人

見狐行方渡余按風俗通云里語稱狐欲渡河無
如尾何且狐性多疑故俗有狐疑之說亦未必一
如緣生之言也

屈從其東南流入于渤海

山海經曰南卽從極之淵也一曰中極之淵深三
百仞唯馮夷都焉括地圖曰馮夷恒乘雲車駕二
龍河水又出於陽紆凌門之山而注於馮逸之山
穆天子傳曰天子西征至陽紆之山河伯馮夷之
所都居是惟河宗氏天子乃沈珪璧禮焉河伯乃
與天子披圖視典以觀天子之寶器玉果璿珠燭

銀金膏等物皆河圖所載河伯以禮穆王視圖方
乃導以西邁矣粵在伏羲受龍馬圖於河八卦是
也故命歷序曰河圖帝王之階圖載江河小川州
界之分野後堯壇於河受龍圖作握河記逮虞舜
夏商咸亦受焉李尤盟津銘洋洋河水朝宗于海
徑自中州龍圖所在淮南子曰昔禹治洪水具禱
陽紆蓋於此也高誘以爲陽紆秦藪非也釋氏西
域志曰阿耨達太山其上有大淵水宮殿樓觀甚
大焉山卽崑崙山也穆天子傳曰天子升崑崙封
豐隆之葬豐隆雷公也雷電龍卽阿耨達宮也其

山出六大水山西有大水名新頭河郭義恭廣志
曰甘水也在西域之東名曰新陶水山在天竺國
西水甘故曰甘水有石鹽白如水精大段則破而
用之康泰曰安息月支天竺至伽那調御皆仰此
鹽釋法顯曰度葱嶺已入北天竺境於此順嶺西
南行十五日其道艱阻崖岸險絕其山唯石壁立
千仞臨之目眩欲進則投足無所下有水名新頭
河昔人有鑿石通路施傍梯者凡度七百渡梯已
躡縣絙過河河兩岸相去咸八十步九驛所絕漢
之張騫甘英皆不至也余診諸史傳卽所謂罽賓

之境有盤石之磴道狹尺餘行者騎步相持絙橋
相引二十許里方到縣渡阻險危害不可勝言郭
義恭曰烏秣之西有縣渡之國山谿不通引繩而
渡故國得其名也其人山居佃于石壁間累石爲
室民接手而飲所謂援飲也有白羊小步馬有驢
無牛是其縣渡乎釋法顯又言渡河便到烏菴國
烏菴國卽是北天竺佛所到國也佛遺足跡於此
其跡長短在人心念至今猶爾及曬衣石尚在新
頭河又西南流屈而東南流逕中天竺國兩岸平
地有國名毗荼佛法興盛又經蒲那河河邊左右

有二十僧伽藍此水逕流逕摩頭羅國而下合新頭河自河以西天竺諸國自是以南皆爲中國人民殷富中國者服食與中國同故名之爲國也泥洹已來聖衆所行威儀法則相承不絕自新頭河至南天竺國迄于南海四五萬里也釋氏西域記曰新頭河經罽賓犍越摩河刺諸國而入南海是也阿耨達山西南有水名遙奴山西南小東有水名薩罕小東有水名怛伽此三水同出一山俱入怛水康泰扶南傳曰怛水之源乃極西北出崑崙山中有五大源諸水分流皆由此五大源枝扈黎

大江出山西北流東南注大海枝扈黎卽怛水也故釋氏西域志有怛曲之目怛北有四國最西頭怛曲中者是也有拘夷那竭國法顯傳曰怛水東南流逕拘夷那竭國南城北雙樹間有希連禪河邊世尊於此北首般泥涅分舍利處支僧載外國事曰佛泥涅後天人以新白縹裹佛以香花供養滿七日盛以金棺送出王宮渡一小水水名醯蘭那去王宮可三里許在宮北以旃木爲薪天人各以火燒薪薪了不然大迦葉從流沙還不勝悲號感動天地從是之後他薪不燒而自然也王斂舍

利用金作斗量得八斛四斗諸國王天龍神王各得少許齋還本國以造佛寺阿育王起浮屠於佛泥涅處雙樹及塔今無復有也此樹名娑羅樹其樹華名娑羅法也此華色白如霜雪香無比也竺枝扶南記曰林楊國去金陳國步道二千里車馬行無水道舉國事佛有一道人命過燒葬燒之數千束樵故坐火中乃更著石室中從來六十餘年尸如故不朽竺枝自見之夫金剛常住是明永存舍利利見畢天不朽所謂智空罔窮大覺難測者矣其水亂流於恒恒水又東逕毗舍離城北釋氏

西域志曰毗舍離維邪離國也支僧載外國事曰維邪離國去王舍城五千由旬城周圍三由旬維詰家在大城裏宮之南去宮七里許屋宇壞盡惟見處所爾釋法顯云城北有大林重閣佛住於此本菴婆羅女家施佛起塔也城之西北三里塔名放弓仗恒水上流有一國王王小夫人生肉胎大夫人妬之言汝之生不祥之徵卽盛以木函擲恒水中下流有國王遊觀見水上木函開看見千小兒端正殊特王取養之遂長大甚勇健所往征伐無不摧伏次欲伐父王本國王大愁憂小夫人問

何故愁憂王曰彼國王有千子勇健無比欲來伐
吾國是以愁爾小夫人言勿愁但於城東作高樓
賊來時置我樓上則我能却之王如是言賊到小
夫人於樓上語賊云汝是我子何故反作逆事賊
曰汝是何人云是我母小夫人曰汝等若不信者
盡張口仰向小夫人卽以兩手將乳乳作五百道
俱墜千子口中賊知是母卽放弓仗二父王作是
思惟皆得辟支佛今二塔猶在後世尊成道告諸
弟子是吾昔時放弓仗處後人得知於此處立塔
故以名焉千小兒者卽賢劫千佛也釋氏西域志

曰恒曲中次東有申迦扇奈揭城也佛下三寶階
國也法顯傳曰恒水東南流逕僧迦施國南佛自
忉利天東下三道寶階爲母說法處寶階旣沒阿
育王於寶階處作塔後作石柱柱上作師子像外
道少信師子爲吼怖懼心伏恒水又東逕罽賓饒
夷城南南接恒水城之西北六七里恒水北岸佛
爲諸弟子說法處恒水又東南逕沙祇國北出沙
祇城南門道東佛嚼楊枝刺土中生長七尺不增
不減今猶尚在恒水又東南逕迦維羅衛城北故
曰淨王宮也城東五十里有王園園有池水夫人

入池洗浴出池北岸二十步東向舉手攀樹生太子太子墮地行七步二龍吐水浴太子遂成井池衆僧所汲養也太子與難陀等撲象角力射箭入地今有泉水行旅所資飲也釋氏西域記曰北三里恒水上父王迎佛處作浮圖作佛抱佛像外國事曰迦維羅越國今無復王也城池荒穢惟有空處有優婆塞姓釋可二十餘家是昔淨王之苗裔故爲四姓住在故城中爲優婆塞故尚精進猶有古風彼日浮圖壞盡條王彌更修治一浮圖私訶條王逆物助成今有十二道人住其中太子始生

時妙后所攀樹樹名須阿育王以青石作后攀生太子像昔樹無復有後諸沙門取音樹栽種之展轉相承到今樹枝如昔尚蔭石像又太子見行七步足跡今日文理見存阿育王以青石挾足跡兩邊復以一長青石覆上國人今日恒以香花供養尚見足七形文理分明今雖有石覆無異或人復以數重古具重覆貼著石上逾更明也太子生時以龍王夾太子左右吐水浴太子見一龍吐水煖一龍吐水冷遂成二池今尚一冷一煖矣太子未出家前十日出往王田閭浮樹下坐樹神以七

寶奉太子太子不受於是思惟欲出家也王曰去
宮一據據左一據據右晉言十里也大子以三月
十五日夜出家四天王來迎各捧馬足爾時諸神
天人側塞空中散天香花此時以至河南摩強水
卽於此水邊作沙門河南摩強水在迦維羅越北
相去十由旬此水在羅閱祇瓶沙國相去三十由
旬菩薩於是暫過瓶沙王出見菩薩菩薩於瓶沙
隨樓那果園中住一日日暮便去半達鉢愁宿半
達晉言白也鉢愁晉言山也白山此去瓶沙國十
里明旦便去暮宿曇蘭山去白山六由旬於是逕

詣貝多樹貝多樹在貝多閱祇北去曇蘭山二十
里太子年二十九出家三十五得道此言與經異
故記所不同竺法維曰迦衛國佛所生天竺國也
三千日月萬二千天地之中央也康泰扶南傳曰
昔范旃時有譚楊國人家翔梨嘗從其本國到天
竺展轉流賈至扶南爲旃說天竺土俗道法流通
金寶安積山川饒沃恣其所欲左右大國世尊重
之旃問之今去何時可到幾年可迴梨言天竺去
此可三萬餘里往還可三年踰及行四年方返以
爲天竺之中也恒水又東逕藍莫塔塔邊有池池

中龍守護之阿育王欲破塔作八萬四千塔悟龍
王所供知非世有遂止荒蕪無人羣象以鼻取水
洒地若蒼梧會稽象耕鳥耘矣恒水又東至五河
合口蓋五水所會非所詳矣阿難從摩竭國向毗
舍離欲般泥洹諸天告阿闍世王王追至河上毗
舍離諸梨車聞阿難來亦復來迎俱到河上阿難
思惟前則阿闍世王致恨卻則梨車復怨卽於中
河入火光三昧燒身而般泥洹身二分分各在一
岸二王各持半舍利還起二塔渡河南下一由延
到摩竭提國巴連佛邑卽是阿育王所治之城

城中宮殿皆起墻闕雕文刻鏤累大石作山山下
作石室長三丈廣二丈高丈餘有大乘婆羅門子
名羅汰私婆亦名文殊師利住此城裏爽悟多智
事無不達以清淨自居國王宗敬師事之賴此一
人弘宣佛法外不能陵凡諸中國惟此城爲大民
人富盛競行仁義阿育王壞七塔作八萬四千塔
最初作大塔在城南三里餘此塔前有佛跡起精
舍戶北向塔塔南有石柱圍丈四五高三丈餘上
有銘題云阿育王以閻浮提布施四方僧還以錢
贖塔北三四百步阿育王於此作泥犁城中有石

柱亦高三丈餘上有師子柱有銘記作泥犁城因緣及年數日月恒水又東南逕小孤石山山頭有石室石室南向佛昔坐其中天帝釋以四十二事問佛一一以指畫石畫跡故在洹水又西逕王舍新城是阿闍世王所造出城南四里入谷至五山裏五山周圍狀若城郭卽是滌沙王舊城也東西五六里南北七八里阿闍世王始欲害佛處其城空荒又無人徑入谷搏山東南上十五里到耆闍崛山未至頂三里有石窟南向佛坐禪處西北三十步復有一石窟阿難坐禪處天魔波旬化作鷗

鷲恐阿難佛以神力隔石舒手摩阿難肩怖卽得止鳥跡手孔悉存故曰鷗鷲窟也其山峯秀端嚴是五山之最高也釋氏西域記云耆闍崛山在阿耨達王舍城東北西望其山有坐梵天來諸佛處四天王捧鉢處皆立塔外國事曰毗婆梨佛在此一樹下六年長者女以金鉢盛乳糜上佛佛得乳糜住足尼連河浴浴竟於河邊噉糜竟擲鉢水中逆流百步鉢投河中迦梨郊龍王接取在宮供養先三佛鉢亦見佛於河傍坐摩訶菩提樹摩訶菩提樹去貝多樹二里於此樹下七日思惟道成魔

兵試佛釋氏西域記曰尼連水南流恒水水西有佛樹佛於此苦行日食糜六年西去城五里許樹東河上卽佛入水浴處東上岸尼衢立樹下坐修舍女上糜於此於是西渡水於六年樹南貝多樹下坐降魔得佛也佛圖調曰佛樹中枯其來時更生枝葉竺法維曰六年樹去佛樹五里書其異也法顯從此東南行還巴連佛邑順恒水西下得一精舍名曠野佛所住處復順恒水西下到迦尸國波羅奈城竺法維曰波羅奈國在迦維羅衛國南千二百里中間有恒水東南流佛轉法輪處在國

北二十里樹名春浮維摩所處也法顯曰城之東北十里許卽鹿野苑本辟支佛住此常有野鹿栖宿故以名焉法顯從此還居巴連佛邑又順恒水東行其南岸有瞻婆大國釋氏西域記曰恒曲次東有瞻婆國城南有佉下蘭池池水恒在北佛不說戒處也恒水又逕波麗國卽是佛外祖兩峯雙立相去二三里中道鷲鳥常居其嶺土人號曰耆闍崛山山名耆闍鷲也又竺法維云胡語羅闍祇國有靈鷲山胡語云耆闍崛山山是青石頭似鷲鳥阿育王使人鑿石假安兩翼兩脚鑿治其身今

見存遠望似鷲鳥形故曰靈鷲山也數說不同遠
邇亦異今以法顯親宿其山誦首楞嚴香華供養
聞見之宗也又西逕伽耶城南二十里到佛苦行
六年其樹處有林木西行三里到佛入水洗浴天
王按樹枝得攀出池處又北行二里得彌家女奉
佛乳糜處從此北行二里佛於一大樹下石上東
向坐食糜處樹石悉在廣長六尺高減二尺國中
寒暑均調樹木或數千歲乃至萬歲從此東北行
二十里到一石窟菩薩入中西向結跏趺坐心念
若我成道當有神驗石壁上卽有佛影現長三尺

許今猶明亮時天地大動諸天在空言此非過去
當來諸佛成道處去此西南行減半由延貝多樹
下是過去當來諸佛成道處諸天尊引菩薩起行
離樹三十步天授吉祥草菩薩受之復行十五步
五百青雀飛來繞菩薩三匝而去菩薩前到貝多
樹下敷吉祥草東向而坐時魔王遣三玉女從北
來試魔王自從南來試菩薩以足指按地魔兵卻
散三女變爲老姥不自服佛於尼拘律樹下方石
上東向坐也法顯曰恒水又東到多摩梨帝國卽
是海口也釋氏西域記曰大秦一名梨帝康泰扶

南傳曰從迦那調洲西南入大灣可七八百里乃到枝扈黎大江口渡江逕西行極大秦也又云發拘利口入大灣中正西北入可一年餘得天竺江口名恒水江口有國號擔袂屬天竺遣黃門字與爲擔袂王釋氏西域記曰恒水東流入東海蓋二水所注兩海所納自爲東西也釋氏論佛圖調列山海經曰西海之南流沙之濱赤水之後黑水之前有大山名崑崙又曰鍾山西六百里有崑崙山所出五水粗以佛圖調傳也又近推得康泰扶南傳傳崑崙山正與調合如傳自交州至天竺最近

泰傳亦知阿耨達山是崑崙山釋云賴得調傳豁然爲解乃宜爲西域圖以語法汰法汰以常見怪謂漢來諸名人不應何在敦煌南數千里而不知崑崙所在也釋云復書曰按穆天子傳穆王於崑崙側瑤池上觴西王母云去宗周灑澗萬有一千一百里何得不如調言子今見泰傳非爲前人不
知也而今以後乃知崑崙山爲無熱丘何云乃胡國外乎余考釋氏之言未爲佳證穆天子竹書及山海經皆埋緼歲久編韋稀絕書策落次難以緝綴後人假合多差遠意至若訪地脉川不與經符

驗程準途故自無會釋氏不復根其艱歸之鴻致
陳其細趣以辨其非非所安也今按山海經曰崑
崙墟在西北帝之下都崑崙之墟方八百里高萬
仞上有木禾面有九井以玉爲檻面有九門門有
開明獸守之百神之所在郭璞曰此自別有小崑
崙也又按淮南之書崑崙之上有木禾珠樹玉樹
瓊樹不死樹沙棠琅玕在其東絳樹在其南碧樹
瑤樹在其北傍有四百四十門門間四里里間九
純純丈五尺傍有九井玉橫維其西北隅北門開
以納不周之風傾宮旋室縣圃涼風樊桐在崑崙

閭闔之中是其疏圃疏圃之池浸之黃水黃水三
周復其原是謂丹水飲之不死河水出其東北陬
赤水出其東南陬洋水出其西北陬凡此四水帝
之神泉以和百藥以潤萬物崑崙之丘或上倍之
是謂涼風之山登之而不死或上倍之是謂玄圃
之山登之乃靈能使風雨或上倍之乃維上天登
之乃神是謂太帝之居禹乃以息土填鴻水以爲
名山掘崑崙墟以爲下地高誘曰地或作池山海
經曰不周之山不周之北門以納不周之風則以
髣髴近浮圖謂之說阿耨達六水葱嶺于闐二水

之限與經史諸書全相乖異又按十三洲說崑崙
山也在西海之戍地北海之亥地去岸十三萬里
有弱水周迴繞匝山東南接積石圃西北接北戶
之室東北臨大活之井西南至承淵之谷此四角
大山寔崑崙之支輔也積石圃南頭昔西王母告
周穆王去咸陽三十六萬里山高平地三萬六千
里上有三角面方廣萬里形如偃盆上有金臺玉
闕亦元氣之所合天帝君所治處也考東方朔之
言及經五萬里之文難言浮圖調康泰之是矣六
合之內水澤之藏大非爲巨小非爲細存非爲有

隱非爲無其所苞者廣矣於中同名異域稱謂相
亂亦不爲寡至如東海方丈亦有崑崙之稱西洲
銅柱又有九府之治東方朔十洲記曰方丈在東
海中央東西南北岸相去正等方丈面各五千里
上專是羣龍所聚有金玉琉璃之宮三天司命所
治處羣仙不欲升天者皆往來也上廣故曰崑崙
山有三角其一角正北干辰星之輝名曰閭風巔
其一角正西名曰玄圃臺其一角正東名曰崑崙
宮其處有積金爲天墉城面方千里城上安金臺
五所玉樓十二其北戶出承淵山又有墉城金臺

玉樓相似如一淵精之闕光碧之堂瓊華之室紫
翠丹房錦雲燭日朱霞九光西王母之所治真宮
仙虛之所宗上通璿璣元氣流布五常玉衡理九
天而調陰陽品物羣生希竒特出皆在於此天人
濟濟不可具記張華叙東方朔神異經曰崑崙有
銅柱焉其高入天所謂天柱也圍三千里負周如
削下有迴屋仙人九府治上有大鳥名曰希有南
向張左翼覆東王公右翼覆西王母背上小處無
羽一萬九千里西王母歲登翼上之東王公也故
其柱銘曰崑崙銅柱其高入天員周如削膚體美

焉其鳥銘曰有鳥希有綠赤煌煌不鳴不食東覆
東王公西覆西王母王母欲東登之自通陰陽相
須唯會益工遁甲開山圖曰五龍見教天皇被跡
望在無外柱洲崑崙山上榮氏注云五龍治在五
方爲行神五龍降天皇兄弟十二人分五方爲十
二部法五龍之跡行無爲之化天下仙聖治在柱
洲崑崙山上無外之山在崑崙東南一萬二千里
五龍天皇皆出此中爲十二時神也山經曰崑崙
之丘實惟帝之下都其神陸吾是司天之九部及
帝之囿時然六合之內其苞遠矣幽致沖妙難本

以情萬像遐淵渾思絕根尋自不登兩龍於雲轍
騁八駿於龜途等軒轅之訪百靈方大禹之集會
計儒墨之說孰使辨哉

又出海外南至積石山下有石門河水冒以西南流
山海經曰河水出渤海又海水西北入禹所道積
石山山在隴西郡河間縣西南羌中余考羣書咸
言河出崑崙重源潛發淪于蒲昌出于海水故洛
書曰河自崑崙出于重野謂此矣逕積石而爲中
國河故成公子安大河賦曰覽百川之弘壯莫尚
美於黃河潛崑崙之峻極出積石之嵯峨釋氏西
域傳曰河自蒲昌潛行地下南出積石而經文在
此似如不比積石宜在蒲昌海下矣

水經第一

水經第二

河水二

河水又南入葱嶺山

河水重源有三非為二也一源西出身毒之國葱嶺之上西去休循二百餘里皆故塞種也南屬葱嶺高千里西河舊事曰葱嶺在敦煌西八千里其山高上生葱故曰葱嶺也河源潛發其嶺分為

漢 桑 欽撰

後魏 酈道元注

明 吳 瑄校

二水一水西逕休循國南在葱嶺西郭義恭廣志
曰休循國居葱嶺其山多大葱又逕難兜國北北
接休循西南去罽賓國三百四十里

河水又西逕罽賓國北

月氏之破塞王南君罽賓治循鮮城土地平和無
所不有金銀珍寶異畜奇物踰于中夏大國也山
嶽有大頭痛小頭痛之山赤土身熱之阪人畜同
然

河水又西逕月氏國南

治監氏城其俗與安息同匈奴冒頓單于破月氏
殺其王以頭爲飲器國遂分遠過大宛西居大夏
爲大月氏其餘小衆不能去者共保南山羌中號
小月氏故有大月氏小月氏之名也

又西逕安息南

城臨媯水地方數千里最大國也有商賈車船行
旁國畫革旁行爲書記也空須菩提置鉢在金杙
上佛一足跡與鉢共在一處國王臣民悉持梵香
七寶璧玉供養塔跡佛牙袈裟頂相舍利悉在佛
樓沙國釋氏西域記曰捷陀越王城西北有鉢吐
羅越城佛袈裟王城也東有寺重復尋川水西北

十里有河步羅龍淵佛到上浣衣處浣石尚存其
水至安息注雷翥海又曰捷陀越西西海中有安
息國竺枝扶南記曰安息國去私訶條國二萬里
國土臨海上卽漢書天竺安息國也戶近百萬最
大國也漢書西域傳又云犁靛條支臨西海長老
傳聞條支有弱水西王母亦未嘗見自條支乘水
西行可百餘日近日所入也或河水所通西海矣
故涼土異物志曰葱嶺之水分流東西西入大海
東爲河源禹記所云崑崙者焉張騫使大宛而窮
河源謂極於此而不達於崑崙者也河水自葱嶺

分源東逕伽舍羅國釋氏西域記曰有國名伽舍
羅逝此國狹小而總萬國之要道無不由城南有
水東北流出羅逝西山山卽葱嶺也逕岐沙谷出
谷分爲二水一水東流逕無雷國北治盧城俗與
其西夜子合同又東流逕依耐國北去無雷五百
四十里俗同子合又東流逕蒲犁國北治蒲犁谷
北去疏勒五百五十里俗與子合同
河水與蜺羅歧禘水同注雷翥海

釋氏西域傳曰蜺羅歧禘出阿耨達山西之北逕
于闐國漢書西域傳曰于闐以西水皆西流注于

西海

又西逕四大塔北

釋法顯所謂竺刹尸羅國漢言截頭也佛爲菩薩時以頭施人故因名國國東有投身餒餓虎處皆起塔又西逕陀衛國北

是阿育王子法益所治邑佛爲菩薩時亦於此國以眼施人其處亦起大塔又有佛樓沙國天帝釋變爲牧牛小兒聚土爲佛塔法王因而成大塔所謂四大塔也法顯傳曰國有佛鉢月氏王大興兵衆來伐此國欲持鉢去置鉢象上象不能進更作

四輪車載鉢八象共牽復不進王知鉢緣未至於起塔留鉢供養鉢容二斗雜色而黑多四際分明厚可二分甚光澤貧人以少華投中便滿富人以多華供養正復百千萬斛終亦不滿佛圖曰佛鉢青玉也受三斗許彼國寶之供養時願終日香華不滿則如言願一把滿則亦便如言又按道人竺法維所說佛鉢在大月支國起浮圖高三十丈七層鉢處第二層金絡絡鑲縣鉢鉢是青石或云縣鉢虛

河水又東逕皮山國北

治皮山城西北去莎車三百八十里

其一源出于闐國南山北流與葱嶺河合東注蒲昌海河水又東與于闐河合

南源導于闐南山俗謂之仇摩置自置北流逕于闐國西治西城上多玉石西去皮山三百八十里東去陽關五千餘里釋法顯自烏帝西南行路中無人民沙行艱難所逕之苦人理莫比在道一月五日得達于闐其國殷庶民篤信多大乘學威儀齊整器鉢無聲南城一十五里有利刹寺中有石鞞石上有足跡彼俗言是辟支佛跡法顯所不傳

疑非佛跡也

又西北流注于河

卽經所謂北注葱嶺河也

南河又東逕于闐北

釋氏西域記曰河水東流三千里至于闐屈東北流者也漢書西域傳曰于闐已東水皆東流

南河又東北逕扞彌國北

治扞彌城西去于闐三百九十里南河又東逕精絕國北西去扞彌四百六十里

南河又東逕且末國北

又東右會阿耨達大水釋氏西域記曰阿耨達山西北有大水北流注牢蘭海者也其水北流逕且末南山又北逕且末城西國治且末城西通精絕二千里東去鄯善七百二十里種五穀兵俗略與漢同又曰且末河東北流逕且末北又流而左會南河會流東逝通爲注濱河注濱河又東逕鄯善國北治伊循城故樓蘭之地也樓蘭王不恭於漢元鳳四年霍光遣平樂監傅介子刺殺之更立後王漢又立其前王質子尉屠耆爲王更名其國爲鄯善百官祖道橫門王自請天子身在漢久恐爲

前王子所害國有伊循城土地肥美願遣將屯田積粟令得依重遂置田以鎮撫之敦煌索勤字彥義有才畧刺史毛奕表行貳師將軍酒泉敦煌兵千人至樓蘭屯田起白屋召鄯善焉耆龜茲三國兵各千橫斷注濱河河斷之日水奮勢激波凌冒隄勤厲聲曰王遵建節河隄不溢王霸精誠呼沱不流水德明古今一也勤躬禱祀水猶未減乃列陣被仗鼓譟謹叫且刺且射大戰三日水乃迴減灌浸沃衍胡人稱神大田三年積粟百萬威服外國其水東注澤澤在樓蘭國北扞泥城其俗謂之

東故城去陽關千六百里西北去烏壘千七百八十五里至墨山國千三百六十五里西北去車師千八百九十里土地沙鹵少田仰穀傍國國出玉多葭葦檉柳胡桐白草國在東垂當白龍堆乏水草常主發導負水擔糧迎送漢使故彼俗謂是海爲牢蘭海也釋氏西域記曰南河自于闐東於北三千里至鄯善入牢蘭海者也北河自岐沙東分南河卽釋氏西域記所謂二支北流逕屈茨烏夷禪善入牢蘭海者也北河又東北流分爲二水枝流出焉北河自踈勒逕流南河之北

漢書釋氏西域傳曰葱嶺以東南北有山相距千餘里東西六千里河出其中暨于溫宿之南左合枝水上承北河于踈勒之東西北流逕踈勒國南又東北與踈勒北山水合水出北谿東南流逕踈勒城下南去莎車五百六十里有市列西當大月氏大宛康居道釋氏西域記曰國有佛浴牀赤真檀木作之方四尺王於宮中供養漢永平十八年耿恭以戊巳校尉爲匈奴左鹿蠡王所逼恭以此城側澗傍水自金蒲遷居此城匈奴又來攻之壅絕澗水恭於城中穿井深一十五丈不得水吏士渴

乏笮馬糞汁飲之恭乃仰天歎曰昔貳師拔佩刀
刺山飛泉湧出今漢德神明豈有窮哉整衣服向
井再拜爲吏士禱之有頃水泉奔出衆稱萬歲乃
揚水以示之虜以爲神遂卽引去後車師叛與匈
奴攻恭食盡窮困乃煮鎧弩食其筋革恭與士卒同
死生成無二心圍恭不能下關寵上書求救建初
元年明帝納司徒鮑昱之言遣兵救之至柳中以
校尉關寵分兵入高昌壁攻交河城車師降遣恭
軍吏范羌將兵二千人迎恭遇大雪丈餘僅能至
城中夜聞兵馬大恐羌逕呼曰我范羌也城中皆

稱萬歲開門相持涕泣尚有二十六人衣屨穿決
形容枯槁相依而還

北河又東逕莎車國南

治莎車城西南 去蒲犁七百四十里漢武帝開
西域田於此有鐵山出青玉

北河之東南逕温宿國

治温宿城土地物類與鄯善同北至烏孫赤谷六百
一十里東通姑墨二百七十里於此枝河右入北

河

北河又東逕姑墨國南

水經

卷之二

入姑墨川水注之導姑墨西北赤沙山東南流逕
姑墨國西治南至于闐馬行十五日土出銅鐵及雌
黃其水又東南流右注北波河又東逕龜茲國南
又東左合龜茲川水有二源西源出北大山南釋
氏西域記曰屈茨北二百里有山夜則火光晝日
但煙人取此山石炭冶此山鐵恒充三十六國用
故郭義恭廣志龜茲能鑄冶其水南流逕赤沙山
釋氏西域記曰國北四十里山上有寺名雀離大
清淨又出山東南流枝水左派焉又東南水流三
分右二水俱東南流注此河又東川水龜茲東北

赤沙積梨南流枝水右出西南入龜茲城音丘茨
也故延城矣西去姑墨六百七十里川水又東南
流逕于輪臺之東也昔漢武帝初通西域置校尉
屯田于此搜粟都尉桑弘羊奏言故輪臺以東地廣
饒水草有溉田五千頃以上其處溫和田美可益
通溝渠種五穀收穫與中國同時匈奴弱不敢近
西域於是徙莎車相去千餘里卽是臺也其水又東
南流右會西川枝水水有二源俱受西川東流逕
龜茲城南合爲一水水間有故城蓋屯校所守也
其水東南注東川東川水又東南逕烏壘國南治

水經 卷之二
烏壘城西去龜茲三百五十里東去玉門陽關二千七百三十八里與渠犂田官相近土地肥饒於西域爲中故都護治焉漢使持節鄭吉并護北道故號都護都護之起自吉置也其水又東南注大河大河又東右會敦薨之水其水出焉耆之北敦薨之山在匈奴之西烏孫之東山海經曰敦薨之水出焉而西流注于沕澤出於崑崙之東北隅實惟河源者也二源俱道西源東流分爲二水西南流出於焉耆之西經流焉耆之野屈南東南流注于敦薨之渚右水東南流又分爲二左右焉耆之國

城居四水之中在河水之洲治員渠城西去烏壘四百里南會兩水同注敦薨之浦東源東南流分爲二水但澗瀾雙引洪湍濬發俱東南流逕出焉耆之東導于危須城西國治危須城西去焉耆百里又東南流注于敦薨之藪川流所積渾水斯漲溢流爲海史記曰焉耆近海多魚鳥東北隔大山與車師接敦薨之水自西海逕尉犂國國治尉犂城西去都護治所三百里北去焉耆百里其水又西出沙山鐵關谷又西南流連城別注裂以爲田桑弘羊曰臣愚以爲連城以西可遣屯田以威西國卽

此處也其水又屈而南逕渠犁國西故史記曰西
有大河卽斯水也又東南流逕渠犁國治渠黎城
西北去烏壘三百三十里漢武帝通西域屯渠黎
卽此處也南與精絕接東北與尉犁接又南流注
于河山海經曰敦薨之水西流注于洶澤蓋亂河
流自西南注也河水又東逕墨山國南治墨山城
西至尉犁二百四十里

河水又東逕注賓城南又東逕樓蘭城南而東注
蓋發田土所屯故城禪國名耳

河水又東注于洶澤

卽經所謂蒲昌海也水積鄯善之東北龍城之西
南龍城故姜賴之靈胡之大國也蒲海溢盪覆其
國城基尚存而至元晨發西門暮達東門澮其岸
岸餘溜風吹稍成龍形皆西面向海因名龍城地
廣千里皆爲鹽而剛堅也行人所逕畜產皆布氈
卧之掘發其下有巨桃以次相累類霧
氣雲浮寡見星日少禽多鬼怪西接鄯善東連三
沙爲海之北隘矣故蒲昌亦有鹽澤之稱也山海
經曰不周之山北望諸毗之山臨彼岳崇之山東
望洶澤河水之所潛也其源渾渾泡泡者也東去

玉門陽關一千三百里廣袤三百里其水澄渟冬夏不減其中洄湍電轉爲隱淪之脉當滾流之上飛禽奮翮於霄中者無不墜於淵波矣即河水之所潛而出於積石也

又東入塞過敦煌酒泉張掖郡南

河自蒲昌有隱淪之證並間關入塞之始自此經當求實致也河水重源又發于西塞之外出於積石之山山海經曰積石之山其下有石門河水冒以西南流是山也萬物無不有焉禹貢所謂導河自積石也山在西羌之中燒當所居也延熹二年

西羌燒當犯塞護羌校尉段熲討之追出塞至積石山斬首而還司馬彪曰西羌者自析支以西濱於河首在右居也河水屈而東北流逕於析支之地是爲河曲矣應劭曰禹貢析支屬雍州在河關之西東去河關千餘里羌人所居謂之河曲羌也東北逕歷敦煌酒泉張掖南應劭地理風俗記曰敦煌酒泉其水甘若酒味故也張掖言張國臂掖以威羌狄說文曰郡制天子地方千里分爲百縣縣有四郡故春秋傳曰上大夫縣下大夫郡至秦始皇置三十六郡以監縣矣從邑君聲釋名曰郡群也人所

群聚也黃義仲十三州記曰郡之言君也改公侯之封而言君者至尊也郡守專權君臣之禮彌崇今郡字君在其左邑在其右君爲元首邑以載民故取名於君謂之郡漢官曰秦用李斯議分天下爲三十六郡凡郡或以列國陳魯齊吳是也或以舊邑長沙丹陽是也或以山陵太山山陽是也或以川原西河河東是也或以所出金城城下得金酒泉泉味如酒豫章樟樹生庭鴈門鴈之所育是也或以號令禹合諸侯大計東治之山會計國名會稽是也河逕其南而纏絡遠矣

河水又自東河曲逕西海郡南

漢平帝時王莽秉政欲耀威德以服遠方諷羌獻西海之地置西海郡而築五縣焉周海亭燧相望莽篡政紛亂郡亦棄廢

河水又東逕允川而歷大榆小榆谷北

羌迷唐鍾存所居也永元五年貫友代聶尚爲護羌校尉攻迷唐斬獲八百餘級收其熟麥數萬斛於逢留河上築城以盛麥其作大船於河峽作橋渡兵迷唐遂遠依河曲永元九年迷唐復與鍾存東寇而還十年謁者王信耿譚西擊迷唐降之詔

聽還大小榆谷迷唐種人以漢造河橋兵來無時故地
不可居復叛居河曲與羌爲讎種人與官兵擊之
允川去迷唐數十里營止遣輕兵挑戰因引還迷
唐追之至營因戰迷唐敗走於是西海及大小榆
無復聚落隴糜相曹鳳上言建武以來西戎數犯
法常從燒當種起所以然者以其居大小榆谷土地
肥美又近塞內與諸種相傍南得鍾存以廣其衆北
阻大河因以爲固又有西海魚鹽之利緣山濱水
以廣田畜故能彊大常雄諸種今黨援壞沮親屬離
叛其餘勝兵不過數百官及此時建復西海郡縣規

固二榆廣設屯田隔塞羌胡交關之路殖穀富邊
省輸轉之役上拜鳳爲金城西部都尉遂開田二
十七部夾河與建威相首尾後羌反遂罷按段國
沙州記吐谷渾於河上作橋謂之河厲長一百五
十步兩岸累石作基陞節節相次大木從橫更鎮
壓兩邊俱來相去三丈並大材以板橫次之施鉤
欄甚嚴飾橋在清水川東也

又東過隴西河關縣北洮水從東南來流注之
河水右逕沙州北段國曰澆河西南一百七十里
有黃沙沙南北一百二十里東西七十里西極大楊

川望黃沙猶若人委干楛於地都不生草木蕩然
黃沙周迴數百里沙州於是取號焉地理志曰漢
宣帝神爵二年置河關縣蓋取河之關塞也風俗
通曰百里曰同總名爲縣縣玄也首也從系倒首
與縣易偏矣言當玄靜徭役也釋名又曰縣也縣
於郡矣黃義仲十三州記曰縣弦也弦以貞直言
下體之居隣民之位不輕其誓施繩用法不曲如
弦弦聲近縣故以取名今縣字在半也漢帝元年
令天下縣邑城張晏曰令各自築其城也

河水又東北流入西卑郡界左合二川南流入河又

東北濟川水注之

水西南出濫瀆東北流入大谷謂之大谷水北逕
澆河城西南北流注于河

河水東又逕澆河故城北

有二城東西角倚東北去西平二百二十里宋少
帝景平中拜吐谷渾河豺爲安西將軍澆城公卽
此城也

河水又東北逕黃川城河水又東逕石城南左合北
谷水

昔段熲擊羌於石城投河墜坑而歿者八百餘人

即於此也

河水又東北逕黃河城南

西北去西平二百一十七里

河水又東北逕廣遠城北又合烏頭川水

水發遠川引納支津北逕城東而北流注于河

河水又東逕邛川城南

城之左右歷谷有二水導自北山南逕邛亭注于

河

河水又東臨津谿水注之

水自南山北逕臨津城西而北流注于河

河水又東逕臨津城北白土城南

十三州志曰左南津西六十里白土城城在大河

之北而爲緣河濟渡之處北魏涼州刺史郭淮破羌

遮寒於白土卽此處矣

河水又東左會白土川水

水出白土城西北下東南流逕白土城北又東南

注于河

河水又東北會兩川右合二水

參差夾岸連壤負嶮相望河北有層山山甚靈秀

山峯之上立石數百丈亭亭桀竝競勢爭高遠望

卷之二
峯巖若攢圖之託霄上其下層巖峭舉壁岸無階
縣巖之中多石室焉室中若有積卷矣而世士罕
有津逮者因謂之積書巖巖堂之內每時見神人
往還矣蓋鴻衣羽裳之士練精餌食之夫耳俗人
不悟其仙者乃謂之神鬼彼羌目鬼曰唐述復因
名爲之唐述山指其堂密之居謂之唐述窟其懷
道宗玄之士皮冠淨髮之徒亦往棲託焉故秦州
記曰河峽崖傍有二窟一曰唐述窟高四十丈西
二里有時亮窟高百丈廣二十丈深三十丈藏古
書五字亮南安人也下封有水導自是山谿水南

注河謂之唐述水

河水又東得野亭南

又東北流歷研川謂之研川水又東北注于河謂
之野城口

河水又東歷鳳林北

鳳林山名也五巒俱峙者諺云昔有鳳鳥飛遊五
峯故山有斯目矣秦州記曰枹罕原北名鳳林川
川中則黃河東流也

河水又東與灘水合

水導源塞外羌中故地理志曰其水出西塞外東

北流歷野虜中逕消銅城西又東逕河列城東考地說無目蓋出自戎方矣左右列水水出西北谿東北流逕列城北又入灘水城居二水之會也灘水又北逕可石孤城西西戎之名也又東北石合黑城谿水水出西北谿下東南流逕黑城南又東南枝水左出焉又東南入灘水又東北逕榆城東榆城谿水注之水出素和細越西北山下東南流逕于細越川夷俗鄉名也又東南出狄周峽東南右合黑城谿之枝津津水上承谿水東北逕黑城東東北注之榆谿又東南逕榆城南東北注灘水

灘水又東北逕石門口山高峻絕對岸若門故峽得厥名矣疑卽臯蘭山門也漢武帝元狩三年驃騎霍去病出隴西至臯蘭應謂是山之關塞也漢書音義曰臯蘭應在隴西白石縣塞外河名也孟康曰山關名也今是山去河不遠故論者疑目河山之間矣灘水又東北臯蘭山水自山左右翼注灘水灘水又東白石川水注之水出縣西北下東南流枝津東注焉白石川水又南逕白石城西而注灘水水又東逕白石縣故城南王莽更曰順磔闕駟曰白石縣在狄道西北二百八十五里灘水

逕其北今灘水逕東南注之而不出其北也灘水
又東逕白石山北應劭曰白石山在東羅谿注之
水出西南山下東入灘水水又東左合罕开南谿
水出罕开西東南流逕罕开南十三州志曰廣大
坂在袍罕西北罕开在焉昔慕容吐谷渾自燕歷
陰山西馳而創居於此灘水又東逕袍罕縣故城
南應劭曰故罕羌侯邑也十三州志曰袍罕縣在
郡西二百一十里灘水在城南門前東過也灘水
又東北故城川水注之水有二源南源出西南山
下東北流逕金細北嶺北又東北逕一故城南又

東北與北水會北源自西南逕故城北右入南水
亂流東北注灘水灘水又東北左合白石川之枝
津水上承白石川東逕白石城北又東絕罕开谿
又東逕袍罕城南又東入灘水灘水又東北出峽
北流注于河地理志曰灘水出白石縣西塞外東
至袍罕入河

河水又逕左南城南

十三州志曰石城西一百四十里有左南城者也
津亦取名焉

大河又東逕赤岸北

即河夾岸也秦州記曰抱罕有河夾岸岸廣四十丈義熙中乞佛於此河上作飛橋橋高五十丈三年乃就

河水又東洮水注之

地理志曰水出塞外羌中沙州記曰洮水與墊江水俱出嶺臺山山南卽墊江源山東則洮水源自海經曰白水出蜀郭景純注云從臨洮之西傾山東南流入漢而至墊江故段國以爲墊江水也洮水同出一山故知嶺臺西傾之異名也洮水東北流吐谷渾中吐谷渾者始是東燕慕容之枝庶因

氏其字以爲首類之種號也故謂之野虜自洮嶺南北三百里中地草徧是龍鬚而無樵柴洮水又東北流逕陽曾城北沙州記曰嶺城東北三百里有曾城城臨洮水者也建初二年羌攻南部都尉於臨洮上遣行車騎將軍馬防與長水校尉耿恭救之諸羌退聚洮陽卽此城也洮水又東逕共和山南城在四山中洮水又東逕迷和城北羌名也又東逕甘枳亭歷望曲在西南去龍桑二百里洮水又東逕臨洮縣故城北禹治洪水西至洮水之上見長人受黑玉書於斯水上洮水又東北流屈

而逕索西城西建初二年馬防耿恭從五谿祥槩
谷出索西與羌戰破之築索西城徙隴西南部都
尉居之赤水城亦曰臨洮東城也沙州記曰從東
洮至西洮一百二十里者也洮水又屈而北逕龍
桑城西而西北流馬防以建初二年從安故五谿
出龍桑開通舊路者也俗名龍城洮水又西北逕
步和亭東步和川水注之水出西山下東北流出
山逕和亭北東北注洮水洮水又北出門峽歷求
厥川葦川水注之水出桑嵐西谿東流歷桑嵐川
又東逕葦川北東入洮水洮水又北歷峽逕偏橋

出夷始梁右合葦塏川水東南石底嶺下北歷葦
塏川西北注洮水洮水又東北逕桑城東又北會
藍川水水源出來歷川西北谿南流歷川東北流
逕藍川歷水城城北東入洮水洮水又北逕外羌
城西又北逕和博城東城在山內左合和博川川
水出城西南山下東北逕和博城南東北注于洮
水洮水北逕安故縣故城西地理志曰隴西之屬
縣也十三州志曰縣在郡南四十七里蓋延轉擊
狄道安故五谿及羌大破之卽此也洮水又北逕
降狄道故城西闕駟曰今日武始也洮水在城西

東北下又北壘水注之即山海經所謂濫水也水出鳥鼠山西北高城嶺西逕底其山岸崩落者聲聞數百里故楊雄稱響若坻頽是也又西北歷白石山下地理志曰降狄道東有白石山濫水又西北逕武階城南又西北逕降狄道故城東百官表曰縣有蠻夷謂之道有公主謂之邑應劭曰反舌左衽不與華同須有譯言乃通也漢隴西郡治秦昭王二十八年置應劭曰有壠坻在其東故曰隴西也神仙傳曰封君達隴西人服鍊水銀年百歲視之如年三十許騎青牛故號青牛道士王莽更

郡縣之名郡曰厭戎縣曰操虜也昔馬援爲隴西太守六年爲狄道開渠引水種秔稻而郡中樂業卽此水也濫水又西北流逕注于洮水洮水右合二水左會大夏川水水出西山二源合合而亂流逕金柳城南十三州志曰大夏縣西有故金柳城去縣四十里本都尉治又東北逕大夏縣故城南地理志曰王莽之順夏晉書地道記曰縣有禹廟禹所出也又東北出山注于洮水洮水又北翼帶三水亂流北入河地理志曰洮水北至枹罕東入河是也

又東過金城允吾縣北

金城郡治也漢昭帝始元六年置王莽之西海也莽又更允吾爲修遠縣河水逕其南不在其北南有湟水出塞外東逕西王母石室石釜西海鹽池北故闕駟曰其西卽湟水之源也地理志曰湟水所出也湟水又東南流逕龍夷城故西零之地也十三州志曰城在臨羌新縣西三百一十里王莽納西零之獻以爲西海郡治此城湟水又東南逕卑禾羌海北有鹽池闕駟曰縣西有卑禾羌海者也世謂之青海東去西平二百五十里湟水東流

逕湟中城北故小月氏之地也十三州志曰西平張掖之間大月氏之別小月氏之國范曄後漢書曰湟中月氏胡者其王爲匈奴所殺餘種分散西踰葱嶺其弱者南入山從羌居止故受小月氏之名也後漢西羌傳曰羌無弋爰劍者秦厲公時以奴隸亡入三河羌爲神推以爲豪河湟之間多禽獸以射獵爲事遂見敬信依者甚衆其曾孫忍因留湟中爲湟中羌也湟水又東右控四水道源四谿東北流注于湟湟水又東逕赤城北而東入經戎峽山右合羌水出西南山下逕護羌城東故護羌

校尉治又東北逕臨羌城西東北流于湟湟水又東逕臨羌縣故城北漢武帝元狩元年以封孫都爲侯國王莽之監羌也謂之綏戎城非也湟水又東盧谿水注之水出西南盧川東北流注于湟水湟水又東逕臨羌新縣故城南闕駟曰臨羌新縣在郡西百八十里湟水逕城南也城有東西門西北隅有子城湟水又東右合溜谿伏溜石杜蠡四川東北流注之左會臨羌谿水水發新縣西北東南流歷縣北東南入湟水湟水又東龍駒川水注之水又出西南山下東北流逕龍駒城北流注于

湟水湟水又東長寧川水注之水出松山東南流逕晉昌川晉昌川水注之長寧水又東南養女川水注之水發養女北山有二源皆長湍遠發南總一川逕養女山謂之養女川闕駟曰長寧亭北有養女嶺即浩疊之西平之北山也亂流出峽南逕長寧亭東城有東西門東北隅有金城西平西北四十里十三州志曰六十里遠矣長寧水又東南與一水合水出西山東南流水出南山上有風伯祠春秋祭之其水東南逕長寧亭南東入長寧水長寧水又東南流注于湟水湟水又東牛心川水

注之水出 南遠山東北流逕牛心川東又北逕西平亭西東北入湟水湟水又逕西平城北東城即故亭也漢景帝六年封隴西太守北地公孫渾邪爲侯國魏黃初中立西平郡憑倚故亭增築南西北三城以爲郡治湟水又東逕土樓南樓北倚山原峯高三百尺又若削成樓下有神祠彫墻故壁存焉闕駟曰西平亭北有土樓神祠者也今在亭東北五里右則五泉注之泉發西平亭北鴈次相綴東北流至土樓南北入湟水湟水又東右合葱谷水水有四源各出一谿亂流注于湟水又東

逕東亭北東出漆峽山峽也東流右則漆谷常谿注之左則甘夷川水入焉湟水又東安夷川水注之水發遠山西北逕控衆川北屈逕安夷城西北東入湟水湟水又東逕安夷縣故城城有東西門去西平亭東七十里闕駟曰四十里湟水又東左合宜春水水出東北宜春谿西南流至于安夷南入湟水湟水又東勒且谿水注之水出縣東南勒且谿北流逕安夷城東而北入湟水湟水有勒且之名疑卽此號也闕駟曰金城河初與浩疊河合又與勒且河合者也湟水又東左合承流谷水南入右

會達扶東西二谿水參差北注亂流東出六山名也東流期頓雞谷二水北流注之吐鄒孤長門兩川南流入湟水湟水又東逕樂都城南東流又合來谷乞斤流二水左會陽非流谿細谷三水東逕破羌縣故城南應劭曰漢宣帝神爵二年置城省南門十三州志曰湟水河在南門前東過六谷水自南破羌川自北左右翼注湟水又東南逕小晉興城北故都尉治闕駟曰允吾縣西四十里有小晉興城也湟水又東與閭門河合即浩疊河也出西北塞外東入塞逕敦煌酒泉張掖南東南逕西平

之鮮谷塞尉故城南又東南與湛水合水有二源西水出白嶺下東源發于白岸谷合爲一川東南流至霧山注閭門河閭門河又東逕養女北山東南左合南流川水出北山南流入于閭門河河又東逕浩疊縣故城南王莽改曰興武矣闕駟曰浩讀閭也故亦曰閭門水兩兼其稱矣又東流注于湟水故地理志曰浩疊水東至允吾入湟水又東逕允吾縣北爲鄭伯津與潤水合水出縣北今居縣西北塞外南流逕其縣故城西漢武帝元鼎二年置王莽之罕虜也又南逕永登亭西歷黑石谷

南流注鄭伯津湟水又東逕允街縣故城南漢宣
帝神爵二年置王莽之脩遠亭也縣有龍泉出允
街谷泉眼之中水文成蛟龍或試撓破之尋平成
龍畜生將飲者皆畏避而走謂之龍泉下入湟水
湟水又東逕枝陽縣逆水注之水出允吾縣之參
街谷東南流逕街亭城南又東南逕陽非北亭又
東南逕廣武城西故廣武都尉治郭淮破叛羌故
無載於此處也城之西南二十許里水西有馬蹄
谷漢武帝聞大宛有天馬遣李廣利伐之始得此
馬有角爲竒故漢賦天馬之歌曰天馬來兮歷無

阜逕千里今巡東道胡馬感北風之思遂頓羈絕
絆驤首而馳晨發京城食至敦煌北塞外長鳴而去
因名其處曰候馬亭今晉昌郡南及廣武馬蹄谷
盤石上馬迹若踐泥中有自然之形故其俗號曰
天馬徑夷人在邊效刻是有大小之迹體狀不同
視之便別逆水又東逕枝陽縣故城南東南入于
湟水地理志曰逆水允吾東至枝陽入湟河又東
流注于金城河即積石之黃河也闕駟曰河至金
城縣謂之金城河隨地爲名也釋氏西域記曰牢
蘭海東伏流龍沙堆在屯皇東南四百里河步于

鮮卑山東流至金城爲大河出崑崙崑崙即阿耨
達山也

河水又東逕石城南

謂之石城津闕駟曰在金城西北矣河水又東南
逕金城縣故城北應劭曰初築城得金故曰金城也
漢書集注薛瓚云金者取其堅固也故墨子有金
城湯池之言矣王莽之金屏也世本曰鯨作城風
俗通曰城盛也從土成聲管子曰內爲之城外爲
之郭郭外之土開池高則溝之命之曰金城十三
州志曰大河在金城北門東流有梁泉注之出縣

之南山按耆舊言梁暉字始娥漢大將軍梁冀後
冀誅入羌後其祖父爲羌所推爲渠帥而居北城
土荒民亂暉將移居袍罕出頓此山爲羣羌圍迫
無水暉以所執榆鞭豎地以青羊祈山神泉湧出
榆木成林其水自縣北流注于河也

又東過榆中縣北

昔蒙恬爲秦北逐戎人開榆中之地按地理志曰
金城郡之屬縣也故徐廣史記音義曰榆中在金
城卽阮嗣宗勸進文所謂榆中以南者也

又東過天水北界

苑川水出勇士縣之子城南山東北流歷此城川世謂之子城川又北逕牧師苑故漢牧苑之地也羌豪迷吾等萬餘人到襄武首陽平襄勇士至抄此苑焉焚燒亭驛即此處也又曰苑川水地爲龍馬之沃土故馬援請與田戶中分以自給也有東西二苑城相去七里西城即乞佛所都也又北入于河也

又北過武威媼圍縣東北

河水逕其界東北流縣西南有泉源東逕其縣南又東北入河也

又東北過天水勇士縣北

地理志曰蒲福也屬國都尉治王莽更名之曰紀德水出縣山世謂之二十八渡水東北流谿澗繁曲途出其中逕二十八渡行者勤於溯涉故因名焉北逕其縣而下注河又有赤擘川水南出赤蒿谷北流逕赤擘川又北逕牛官川又北逕義城西北北流歷三城川而北流注于河也

又東北過安定北界麥田山河水東北流逕安定祖厲縣故城西北

漢武帝元鼎五年幸雍遂踰隴登空同西臨祖厲

河而還卽於此也王莽更名之曰鄉禮也李斐曰音賴又東北祖厲川水注之水出祖厲南山北流逕祖厲縣而西北流注于河水

河水又東北逕麥田城西又北與麥田泉水合水出城西北西南流注于河

河水又東北逕麥田山西

在安定西北六百四十里

河水又東北逕于黑城北又東北高平川水注之

卽若水也水出高平大壟山若水谷建武八年世祖征隗囂漢從高平第一城若水谷入卽是谷也東

北流逕高平縣故城東漢武帝元鼎三年安定郡治也王莽更名其縣曰鋪睦西十里有獨阜阜上有故臺臺側有風伯壇故世俗呼此阜爲風堆其水又北龍泉水注之水出縣東北七里龍泉東北流注高平川川水又北出秦城長城在縣北一十五里又西北流逕東西二太婁故城門北合一水水有五源咸出隴山西東水發源縣西南二十六里湫淵淵在四山中湫水北流西北出長城北與次水會水出縣西南四十里長城西山中北流逕魏行宮故殿東又北次水注之出縣西南四十里

山中北流逕行宮故殿西又北合次水水出縣西南四十八里東北流又與次水合水出縣西南六十里醜陽山東北流左會右水總爲一川東逕西婁北東注若水段頰爲護羌校尉於安定高平若水討先零斬首八千級於是水之上若水又北與石門水合水有五源東水導源高平縣西八十里西北流次水注之水出縣西百二十里如州泉東北流右入東水亂流左會三川參差相得東北同爲一川混濤歷峽峽即隴山之北垂也謂之石門口水曰石門水在縣西北八十餘里石門之水又

東北注高平川川水又北自延水注之西出自延谿東流歷峽謂之自延口縣之西北一百里又東北逕延城南東入高平川川水又北逕廉城東按地理志曰北地有廉城縣關駟言在富平北自昔匈奴侵漢新秦之士率爲狄塲故城舊壁盡從故目地理淪移不可復識當是世人誤證也川水又北若水注之水發縣東北百里山流注高平高平又北逕三水縣西肥水注之水出高平縣西北二百里牽條山西東北流與若勃谿水合有二源總歸一瀆東北流入肥肥水又東北流違泉水注焉

泉流所發導於若勃谿東東北流入肥肥水又東北出峽注于高平川水東有山山東有三水縣故城本屬國都尉治王莽之廣延亭也西南去安定郡三百四十里侍郎張奐為安定屬國都尉治此羌有獻金馬者奐召主簿張祁入于羌前以酒酹地曰使馬如羊不以入廐使金如粟不以入懷盡還不受威化大行縣東有溫泉溫泉東有鹽池故地理志曰縣有鹽官今於城之東北有故城城北有三泉疑即縣之鹽官也高平川水又北入于河河水又東北逕胸卷縣故城西

地理志曰河水別出為河溝東至富平北入河河水於此有上河之名也

水經第二

水經第三

河水三

河水又北過北地富平縣西

河側有兩山相對水出其間即上河峽世謂之爲青山河水歷峽北注枝分東出

河水又北逕富平縣故城西

秦置北地都尉治縣城王莽名郡爲威戎縣曰特武

漢 桑 欽撰

後魏 酈道元注

明 吳 瑄校

建武中曹鳳字仲理爲北地太守政化尤異黃龍
應於九里谷高岡亭角長三丈大十圍稍至十餘
丈天子嘉之賜帛百匹加秩中二千石

河水又北薄骨律鎮城

城在河渚上赫連果城也桑果餘林仍列洲上但
語出戎方不究城名訪諸耆舊咸言故老宿彦言
赫連之世有駿馬死此取馬色以爲邑號故曰城
爲白口騮韻之謬遂仍今稱所未詳也

河水又逕典農城東

世謂之胡城又北逕上河城東世謂之漢城薛瓚

曰上河在西河富平縣即此也馮參爲上河典農
都尉所治也

河水又北逕典農城東

俗名之爲呂城皆參所屯以事農

河水又東北逕廉縣故城東

王莽之西河亭地理志曰卑移山在西北

河水又與北枝津

水受大河東北逕富平城所在分裂以溉田圃北
流入河今無水爾雅曰澶反入言河決復入者也
河之有澶若漢之有潛也

河水又東北逕渾懷鄣西

地理志曰渾懷都尉治塞外者也太和初三齊平徙歷下民居此遂有歷地之名矣南去北城三百里

河水又東北歷石崖山西

去北城五百里山石之上自然有文盡若戰馬之狀粲然成著類似圖焉故亦謂之畫石山也

又北過朔方臨戎縣西

河水東北逕三封縣故城東漢武帝元狩三年置十三州志曰在臨戎縣西一百四十里

河水又北逕臨戎縣故城西

元朔五年立舊朔方郡治王莽之所謂推武也

河水又北有枝渠東出謂之銅口東逕沃野故城南漢武帝元狩三年立王莽之綏武也枝渠東注以溉田所謂智通在我矣

河水又北屈而爲南河出焉河水又北迤西溢於窳渾縣故城東

漢武帝元朔二年開朔方郡治又有西部都尉治有道自縣西北出雞鹿塞王莽更郡曰溝搜縣曰極武其水積而爲屠申澤澤東西一百二十里故

地理志曰屠申澤在縣東即是澤也闕駟謂之渾澤矣屈從縣北流

河水又屈而東流爲北河東逕高闕南

史記趙武靈王旣襲胡服自代並陰山下至高闕爲塞山下有長城長城之際連山刺天其山中斷兩岸雙闕善能雲舉望若闕焉節狀表目故有高闕之名也自闕北出荒中闕口有城跨山結局謂之高闕戍上古迄今常置重捍以防塞道漢元朔四年衛青將十萬人敗右賢王於高闕即此處也河水又東逕臨河縣故城北漢武帝元朔三年封

代恭王子劉賢爲侯國王莽之監河也漢武帝元朔二年大將軍衛青絕梓嶺梁北河是也至河目縣西

河水自臨河縣東逕陽山南

漢書注曰陽山在河北指此山也東流逕石跡阜西是阜破石之文悉有鹿馬之跡故斯阜納稱焉南屈逕河目縣左北假地名也自高闕以東夾山帶河陽山以去皆北假也史記曰秦使蒙恬將十萬人北擊胡度河取高闕據陽山北假中是也北河又南合南河上承西河東逕臨戎縣故城北又

水經 卷之三
東逕臨河縣南又東逕廣牧縣故城北有東部都尉治王莽之鹽官也逕流二百許里東會于河河水又南逕馬陰山西

漢書音義曰陽山在河北陰山在河南謂是山也而即實不在河南史記音義曰五原安陽縣北有馬陰山今山在縣北言陰山在河南又傳疑之非也余按南河北河及安陽縣以南悉沙阜耳無他異山故廣志曰朔方郡北移沙七所而無山以擬之是議誌之僻也陰山在河東南則可矣河水又東南逕朔方縣故城東北

詩所謂城彼朔方也漢元朔二年大將軍衛青取河南地爲朔方郡使校尉蘇建築朔方城即此城也王莽以爲武符者也按地理志云今連鹽澤青鹽澤並在縣南矣又按魏土地記曰縣有大鹽池其鹽大而青白名曰青鹽又名戎鹽入藥分漢置典官鹽池去平地宮千二百里在新秦之中服虔曰新秦地名在北方千里如淳曰長安以北朔方以南也薛瓚曰秦逐匈奴收河南地徙民以實之謂新秦也屈南過五原西安陽縣南河水自朔方東轉逕渠搜縣故城北

地理志曰朔方有渠搜縣中部都尉治王莽之溝
搜亭也禮三朝記曰北發渠搜南撫交阡此與北
對南禹貢之所云析支渠搜矣河水又逕西安陽
故城王莽更之曰鄣安矣河水東逕田辟城南地
理志曰故西部都尉治也屈東過九原縣南

河水又東逕成宜縣故城南

王莽更曰艾虜也

河水又東逕原亭城南

關駟十三州志曰中部都尉治

河水又東逕宜梁縣之故城南

關駟曰五原西南六十里今世謂之石崖城

河水又東逕稠陽城南

東部都尉治逕河陰縣故城北又東逕九原縣故

城南秦始皇置九原郡治此漢武帝元朔二年更

名五原也王莽之獲降郡成平縣矣西北接對一

城蓋五原縣之故城也王莽之填河亭也竹書紀年云

魏襄王十七年邯鄲命吏大夫奴遷于九原又命

將軍大夫適子伐吏皆貂服矣其城南面長河北

背連山秦始皇逐匈奴並河以東屬之陶山築亭

鄣爲河上塞徐廣史記音義曰陶山在五原北即

水經 卷之三
此山也始皇二十四年起自臨洮東暨遼海西並
陰山築長城及南越地晝警夜作民勞怨苦故楊
泉物理論曰秦始皇使蒙恬築長城死者相屬民
歌曰生男慎勿舉生女哺用哺不見長城下尸骸
相支柱其冤痛如此矣蒙恬臨死曰夫起臨洮屬
遼東城塹萬餘里不能不絕地脉此固當死也
又東過臨沃縣南

王莽之振武也

河水又東枝津出焉河水又東流石門水南注之
水出石門山地理志曰北出石門鄣即此山也西

北趣光祿城甘露二年呼韓邪單于還詔遣長樂
衛尉高昌侯董忠車騎都尉韓昌等將萬六千騎
送單于居幕南堡光祿徐自爲所築城也故城得
其名矣城東北即懷朔鎮城也其水自鄣東南流
逕臨沃城東東南注于河

河水又東逕稠陽縣故城南

王莽之固陰也地理志曰自縣北出石門鄣河水
決其西南隅又東南枝津注焉水上承大河於臨
沃縣東流七十里北溉田南北二十里注于河
河水又東逕塞泉城南而東注又東過雲中楨陵縣

南又東過沙南縣北從縣東屈南過沙陵縣西

大河東逕咸陽縣故城南王莽之賁武也

河水屈而流白渠水注之

水出塞外西逕定襄武進縣故城北西部都尉治
王莽更曰伐蠻世祖建武中封趙慮爲侯國也白
渠水西北逕成樂北郡國志曰成樂故屬定襄也
魏土地記曰雲中城東八十里有成樂城今雲中
郡治一名石盧城也白渠水又西逕魏雲中宮南
魏土地記曰雲中宮在雲中故城東四十里白渠水
又西南逕雲中故城南故趙地虞氏記云趙侯自

五原河曲築長城東至陰山又於河西造大城一
箱崩不就乃改上陰山河曲而禱焉晝見群鵠遊
于雲中徘徊經日見大光在其下武侯曰此爲我
乎乃即於其處築城今雲中城是也秦始皇十三
年立雲中郡縣曰遠服矣白渠水又西北逕沙陵
縣故城南王莽之希恩縣也其水西注沙陵湖又
有芒干水出塞外南逕鍾山山即陰山故郎中侯應
言於漢曰陰山東西千餘里單于之苑囿也自孝
武出師攘之於漠北匈奴失陰山過之未嘗不哭
謂此山也其水西南逕武臯縣王莽之永武也又

南逕原陽縣故城西又西南與武泉水合其水東出武泉縣之故城西南縣即王莽之所謂順泉者也水南流又西屈逕北輿縣故城南按地理志曰五原有南輿縣王莽之南利也故此加北舊中部都尉治十二州志曰廣陵有輿故此加北疑太踈遠也其水又西南入芒于水西南逕白道南谷口有長城在右側帶長城背山面澤謂之白道南谷口有城自城北出有高阪謂之白道嶺公路唯土穴出泉挹之不窮余每讀琴操見琴慎相和雅歌錄云飲馬長城窟及其拔陟斯途遠懷古事始知信矣非

虛言也顧瞻左右山樹之上有垣若頽基焉泂谿巨嶺東西無極疑趙武靈王之所築也芒于水又南西逕雲中城北白道中谿水注之水發源武川北塞中其水南流逕武川鎮城以景明中築以禦北狄矣其水西南流歷谷逕魏帝行宮東世謂之阿計頭殿宮城在白道嶺北阜上其城員角而不方四門列觀城內唯臺殿而已其水又西南歷中谿出山西南流於雲中城北於雲中城北南注芒于水芒于又西塞水出懷朔鎮東北芒中南流逕廣德殿西山下余以太和十八年從高祖北巡屆

於陰山之講武臺臺之東有高祖講武碑碑文是中書郎高聰之辭也自臺西出南上山山無樹木唯童阜耳即廣德殿所在也其殿四柱兩厦堂宇綺栱圖畫奇禽異獸之象殿之西北便得焜煌堂雕楹鏤楠取狀古之温室也其時帝幸龍荒遊鸞朔北南秦王仇池楊難當捨蕃委誠重譯拜闕陛見之所也故殿以廣德爲名魏太平真君三年刻石樹碑勒宣時事碑頌云肅清帝道振攝四荒有蠻有戎自彼氏羌無思不服重譯稽顙恂恂南秦歛歛推亡峨峨廣德弈弈焜煌侍中司徒東郡公

崔浩之辭也碑陰題宣成公李孝伯尚書盧遐等從臣姓名若新鏤焉其水歷谷南出陰山西南入芒干水芒干水又西南注沙陵湖湖水西南入于河

河水南入楨陵縣西北

緣胡山歷沙南縣東北兩山二縣之間而出余以太和中爲尚書郎從高祖北巡親所逕涉縣在山南王莽之楨陸也北去雲中城一百二十里縣南六十許里有東西大山山西枕河河水南流脉水尋經殊垂川去之次似非關究也

又南過赤城東又南過定襄桐過縣西

定襄郡漢高六年置王莽之得降也桐過縣王莽更名椅桐者也

河水於二縣之間濟有君子之名

昔漢相帝十三年西幸榆中東行代地洛陽大賈齎金貨隨帝後行夜迷失道往投津長日子封送之渡河賈人卒死津長埋之其子尋求父喪發冢舉尸資費一無所損其子悉以金與之津長不受事聞于帝曰君子也即名其津爲君子濟濟在雲中城西南二百餘里

河水又東南左合一水

水出契吳東山西逕故里南而北俗謂之契吳亭其水又西流注于河

河水又南樹頽水注之

水出東山西南流右合中陵川水水出中陵縣東南山下北俗謂之大浴山其水亦取名焉東北流逕中陵縣故城東北俗謂之北右突城王莽之遮害也十三州志曰善無縣南七十五里有中陵縣世祖建武二十五年置其水又西北右合一水水出東山北俗謂之貸敢山水又受名焉其水自西

北流注于中陵水又西北流逕善無縣故城西王莽之陰館也十三州志曰舊定襄郡治地理志曰照門郡治其水又西北流又會一水水出東山下北俗謂之吐文水山又取名焉北流逕鋤亭南西流土壁亭南西出峽左入中陵水水又北分為二水一水東北流謂之流水又東逕沃陽縣坎城南北俗謂之可不湫城王莽之敬陽也又東北逕沃陽城東又東合可不湫水出東南六十里山下西北流注沃水又會東逕參合縣南魏因參合陁以即名也北俗謂之倉鶴陁道出其中亦謂之參合口

徑在縣之西北即燕書所謂太子寶自河還師參合三軍奔潰即是處也魏立縣以隸涼城郡也西去沃陽縣故城二十里縣北十里有都尉城地理志曰沃陽縣西部都尉治者也北俗謂之阿養城其水又東合一水水出縣東南六十里山下北俗謂之災豆渾水西北流注于沃水又東北流注鹽池地理志曰鹽澤在東北者也今鹽池西南去沃陽故城六十五里池水澱渟淵而不流東西三十里南北二十里池北十里即涼城郡注池西有舊城俗謂之涼城也郡取名焉地理志曰澤有長丞

此城即長丞所治也城西二里有小阜阜下有泉
東南流注池北俗謂之大谷此佳水亦受目焉中
陵川水自枝津西北流右合一水於連嶺北出沃
陽縣東北山下北俗名之烏伏真山水曰誥升袁
河西南流逕沃陽縣左合中陵川亂流西南與一
水合北俗謂之樹頽水水出東山下西南流右合
誥升袁水亂流西南注分爲二水左水枝分南出
北俗謂之太河羅右水西逕故城南北俗名之昆
新城其水自城西南流注于河
河水又南太羅水注之

水源上承樹頽河南流西轉逕武縣故城南十三
州志曰武縣在善無西百五十里北俗謂之太羅
城水亦藉稱焉其水西南流右水注之水導故城
西北五十里南流逕城西北名之曰故槃迴城又
南流注太羅河太羅河又西南流注于河
河水又左得湍水口

水出西河郡美稷縣東南流東觀記曰郭伋細侯
爲并州牧前在州素有恩德老小相攜道路行部
到西河美稷數百小兒各騎竹馬迎拜伋問兒曹
何自遠來曰聞使君到喜故迎伋謝而發去諸兒

復送郭外問使君何日還仍計日告之及還先期
一日念小兒即止野亭須期至乃往其水又東南
流羌人因水以氏之漢沖帝時羌湍狐奴歸化蓋
其渠師也其水俗亦謂之爲遄波水東南流入長
城東鹹水出長城西鹹谷東入湍水又東南渾波
水出西北窮谷東南流注于湍水湍水又東逕西
河富昌縣故城南王莽之富成也湍水又東流入
于湍水左合一水出善無縣故城西南八十里其
水西流歷于呂梁之山而爲呂梁洪其巖層岫衍
澗曲崖深巨石崇竦壁立千仞河流激盪濤湧波

襄雷濟雲洩震天動地曰呂梁未闢河出孟門之
上蓋大禹所闢以通河也司馬彪曰呂梁在離石
縣西今於縣西歷山尋河乃無過峘至是乃爲河
之巨嶮即古梁矣在離石北以東可二百有餘里

又南過西河囿

音銀陽縣東

西河郡漢武帝元朔四年置王莽改曰歸新囿水
出上郡白土縣囿谷東逕其縣南地理志曰囿水
出西東入河王莽更曰黃土也東至長城與神御
水合水出縣南御山峽山東出至長城入于囿囿
水又東逕鴻門縣縣故鴻門亭地理風俗記曰囿

陰縣西五十里有鴻門亭天封宛火井廟火從地
中出囿水又東梁水注之水出西北梁谷東南流
注囿水又東逕囿陰縣北漢惠帝五年立王莽改
曰方陰矣又東桑谷水注之水出西北桑谿東北
桑谿東北流入于囿囿水又東逕囿陰南東流注
于河

河水又東端水入焉

水西出號山山海經曰其山木多漆櫟其草多芎
窮是多冷石端水出焉而東流注于河
河水又南諸次之水入焉

水出上郡諸次山山海經曰諸次之山諸次水出
是山多木無草鳥獸莫居是多衆蛇其水東逕榆
林塞世又謂之榆林山即漢書所謂榆谿舊塞者
也自谿西去悉榆林之數矣緣歷沙陵屈龜茲縣
西出故謂廣長榆也王恢云樹榆爲塞謂此矣蘇
林以爲榆中在上郡非也按始皇本紀西北逐匈
奴自榆中並河以東屬之陰山然榆中在金城東
五十許里陰山在朔方東以此推之不得在上郡
漢書音義蘇林爲是失也其水東入長城小榆林
水合焉歷源西北窮谷其源也又東合首積水西

出首積谿谿東注諸次水又東入于河山海經曰
諸次之水東流注于河即此水也

河水又南湯水注之

山海經曰水出上申之山上無草木而多碣石下
多榛楛湯水出焉東流注于河也

又南離石縣西奢延水注之

水西出奢延縣西南赤沙阜東北流山海經曰所
謂生水出孟山者也郭景純曰孟或作明漢破羌
將軍段熲破羌於奢延澤虜走洛川洛川在南俗
因縣土謂之奢延水又謂之朔水矣東北流逕其

縣故城南王莽之奢節也赫連龍昇七年於是水
之北黑水之南遣將作大匠梁公叱于阿梨改築
大城名曰統萬城蒸土加功雉堞雖久崇墉若新
并造五兵器銳精利乃咸百鍊爲龍雀大鑲號曰
大夏龍雀銘其背曰古之利器吳楚湛盧大夏龍
雀名冠神都可以懷遠可以柔逋如風靡草威服
九區世甚珍之又鑄銅爲大鼓及飛廉翁仲銅駝
龍虎皆以黃金飾之列於宮殿之前則今夏州治
也奢延水又東北與溫泉合源西北出沙谿而東
南流注奢延水奢延水又東黑水入焉出奢延縣黑

澗東南歷沙陵注奢延水奢延水又東合交蘭水
出龜茲交蘭谷東南流注奢延水奢延水又東北
流與鏡波水合水源出南邪山南谷東北流注于
奢延水奢延水又東逕膚施縣帝原水西北出龜
茲縣東南流縣因處龜茲降胡著稱又東南注奢延水
又逕膚施縣南秦昭王三年置上郡治漢高祖并
三秦復以爲郡王莽以漢馬員爲增山連率歸世
祖以爲上郡太守司馬彪曰增山者上郡之別名
也東入五龍山地理志曰縣有五龍山也帝原水
自下亦爲通稱也歷長城東出于赤翟白翟之中

又有年水出西北平谿東南入奢延水又東走馬
水注之水止西南長城北陽周縣故城南橋山昔
二世賜蒙恬死於此王莽更名上陵時山上有黃帝
冢故也帝崩唯弓劍存焉故世稱黃帝仙矣其水
東流昔段熲追羌出橋門至走馬水閒羌在奢延
澤即此處也門即橋山之長城門也始皇令太子
扶蘇與蒙恬築長城起自臨洮至于碣石即是城
也其水東北流入長城又東北注奢延水又東與
白羊水合其水出于西南白羊谿逕谿東北注于
奢延水奢延水又東入于河山海經曰生水東流注

于河

河水又南陵水注之

水出陵川北谿南逕其川西轉入河

河水又南得離石水口

離石北山南流逕離石縣故城西史記云秦昭王伐趙取離石者也漢武帝元朔三年封代共王子劉綰爲侯國後漢西河郡治也其水又南出西轉逕隰城縣故城南漢武帝元朔三年封代恭王子劉忠爲侯國王莽之慈平亭也胡俗語訛尚有于城之稱其水西流注于河也

又南過中陽縣西

中陽縣故城在東東翼汾水隔越重山不濱于河也

又南過土軍縣西

吐京郡治故城即土軍縣之故城也胡漢譯言皆訛僞變矣其城員長而不方漢高帝十一年以封武侯宣義爲侯國縣有龍泉出城東南道左山下牧馬川上多產名駒駿同滇池元河其水西北流至其城東南土軍水出道左高山西南注之龍泉水又北屈逕其城東西北入于河

河水又南合契水

傍谿東入窮谷其源也又南至祿谷水口水源東窮此谿也

河水又南得大蛇水

發源谿首西流入河

河水又南又納厚水

山海經曰厚水出于烏山其上多桑其下多楮陰多鐵陽多玉其水東流注于河俗謂之秀延水東流得浣水口傍谿西轉窮谿便即浣水之源也延水又東會於根水西南谿下根水所發而東北注

延水東南露跳水西出露谿東流又東北入延水亂流注于河河水又南左合信支水水發源東露西流入于河河水又南左會石羊水巡谿東入道源窮谷西流注入河

又南過上郡高奴縣東

域谷水東啓荒源西歷長谿西南入于河水又南合谿口水出孔山南歷谿西流注于河孔山之上有穴如車輪三所東西相當相去各二丈許南北直通故謂之孔山也山在蒲城西南三十餘里河水又右會區水山海經曰次四經之首曰陰山西

北百七十里曰申山其上多穀柞其下多柎榿多金玉區水出焉而東流注于河世謂之清水上郡東流入于長城逕老人山下又東北流至老人谷傍水北出極谿便得水源清水又東得龍尾水口水出北地神泉鄯北山龍尾谿東北流注清水又東會三湖水水出南山三湖谷東北流入清水清水又東逕高奴縣合豐林水地理志謂之洧水也故言高奴縣有洧水肥可難水上有肥可接取用之博物志稱酒泉延壽縣南山出泉水大如管注地爲溝水有肥如肉汁取著噐中始黃後黑如凝

膏然極明與膏無異膏車及水碓其佳彼方人謂之石漆水肥亦所在有之非止高奴縣洧水也項羽以封董翳爲翟王居之三秦此其一也漢高祖破以縣之王莽之利平矣民俗語訛謂之高樓城也豐林川長津瀉注北流會洧洧水又有谿谷水注之水西出奚川東南流入洧水又東注于河河水又南蒲川石樓山南逕蒲城東

即重耳所奔之處也又南歷蒲子縣故城西今大魏之汾州治徐廣晉紀稱劉淵自離石南移蒲子者也闕駟曰蒲城在西北谿武置其水南出得黃

水經卷之三
盧水口東出歷蒲子城南東北入谷極谿便水之
源也又南合紫川水水出東北出紫川谷西南合
江水江水出江谷西北入紫水紫水又西北入蒲
水蒲水又西南入于河水河水入南黑水水出定
陽縣西山二源竒發同瀉一壑東南流逕其縣北
又東南流右合定水俗謂之白水也水西出其縣
南山定水谷更逕定陽縣故城南應劭曰縣在定
水之陽也定水又東注于黑水亂流東南入于河

水經第三

水經第四

漢 桑 欽撰
後魏 酈道元注
明 吳 琯校

河水四

河水又南過河東北屈縣西

河水南逕北屈縣故城西十里有風山上有穴如
輪風氣蕭瑟習常不止當其衝飄也而略無生草
蓋不定衆風之門故也風山西四十里河南孟門
山山海經曰孟門之山其上多金玉其下多黃堊

水經 卷之四
涅石淮南子曰龍門未闢呂梁未鑿河出孟門之
上大溢逆流無有丘陵高阜滅之名曰洪水大禹
疏通謂之孟門故穆天子傳曰北登孟門九河之
蹬孟門卽龍門之上口也實謂黃河之巨阨兼孟
津之名矣此石經始禹鑿河中漱廣夾岸崇深傾
崖返捍巨石臨危若墜復倚古之人有言水非石
鑿而能入石信哉其中水流交衝素氣雲浮往來
遙觀者常若霧露沾人窺深悸魂其水尚崩浪萬
尋縣流千丈渾洪聳怒鼓若山騰濬波頽疊迄于
下口方知慎子下龍門流浮竹非駟馬之追也又

有燕完水注之異源合舍西流注河

河水又南得鯉魚

歷澗東入窮溪首便其源也爾雅曰鱣鮪也出鰲
穴三月則上渡龍門得渡爲龍矣否則點額而還
非夫往還之會何能便有茲稱乎

河水又南羊求水入焉

東出羊求川西逕北屈縣故城南城則夷吾所奔
邑也王莽之朕北也汲郡古文曰翟章救鄭次于
南屈應劭曰有南故加北國語曰二五言於獻公
曰蒲與二屈君之疆也其水西流注于河

河水又南為採桑津

春秋僖公八年晉里克敗狄于採桑是也

又南過皮氏縣西

赤水出西北罷谷川東謂之赤石川東入于河

河水又南合蒲水

西則兩源並發俱導一山出西河陰山縣王莽之

山寧也陰山東麓南水東北與長松水合水出西

三陽山東東北流左入蒲水蒲水又東北與北溪

會同為一川東北注河

河水又南逕卅水西南

丹陽山東北逕冶東俗謂之丹陽城城之左右猶

有遺銅矣其水東北會白水口水出丹山東而西

北注之丹水又東東北入河

河水又南黑水注之

西出丹山東而東北入于河

河水又南至嶧谷傍

東北窮澗水源所導也西南流注于河

河水又南洛水自獵山枝分東派東南注于河

昔魏文侯築館洛陰指謂是水也皮氏縣王莽之

延平也故城在龍門東南不得延逕皮氏方屈龍

門也

一本河上有大字

又南出龍門口汾水從東來注之

昔者大禹導河積石䟽決梁山謂斯處也即經所謂龍門矣魏土地記曰梁山北有龍門山大禹所鑿通孟津河口廣八十步巖際鑄跡遺功尚存岸上并有廟祠祠前有石碑三所二碑文字紊滅不可復識一碑是太和中立竹書紀年晉昭公元年河赤于龍門三里梁惠成王四年河水赤于龍門三日京房易妖占曰河水赤下民恨河水又南右合暢谷水

水自溪東南流逕夏陽縣西北東南注于河

河水又南逕梁山原東

自原山東南出至河晉之望也在馮翊夏陽縣之西臨于河上山崩壅河三日不流晉侯以此問伯宗即是處也春秋穀梁傳曰成五年梁山崩遏河水三日不流召伯尊遇輦者不避使車右鞭之輦者曰所以鞭我者其取道遠矣伯尊因問之輦者曰君親縞素率羣臣哭之斯流矣如其言而河流河水又南嶠谷水注之

水出縣西北梁山東南流橫溪注之水出 三累

山其山層密三成故俗以三累名山按爾雅山三成爲崑丘斯山豈亦崑丘乎山水際有二石室蓋隱者之故居矣細水東流注于峒谷側溪山南有石室西面有兩石室北面有二石室皆因阿結牖連扁接闔所謂石室相距也東廂石上猶傳杵臼之跡庭中亦有舊宇處尚髣髴前基北坎室上有微涓石溜豐周瓢飲似是栖遊隱學之所昔子夏教西河疑即此也而無辨之溪水又東南逕夏陽縣故城北故少梁也秦惠文王十一年更從今名矣王莽之冀亭也其水東南流于河昔韓信之襲

魏王豹也以木罌自此渡

河水又南右合陶渠水

水出西北梁山東南流逕漢陽太守殷濟精廬南俗謂之子夏廟河水又南逕高門南蓋層阜墮缺故流東門之稱矣又東南逕華池南池方三百六十步在夏陽城西北四里許故司馬遷碑文云高門華池在茲夏陽西城北漢陽太守殷濟精舍四里所今高門東去華池三里溪水又東南逕夏陽縣故城南服虔曰夏陽號邑也在太陽東三十里城南又歷高陽宮北又東南逕司馬子長墓北墓

前有廟廟前有碑永嘉四年漢陽太守殷濟瞻仰
遺文大其功德遂建石室立碑樹栢太史公自叙
曰遷生於龍門是其墳墟所在矣溪水東南流入
河昔魏文侯與吳起浮河而下美河山之固即於
此也

河水又西徐水注之

水出西北梁山東南流逕漢武帝登仙宮東東南
流絕疆梁石逕劉仲城北是漢祖兄劉仲之封邑
也故徐廣史記音義曰邵陽國名也高祖八年侯
劉仲是也其水東南逕子夏陵北東入河

河水又南逕子夏石室

東南北有二石室臨側河崖即子夏廟室也

又南過汾陰縣西

河水東際汾陰睢縣故城在睢側漢高帝六年封
周昌爲侯國魏土地記曰河東郡北八十里有汾
陰城北去汾水三里城西北隅曰睢丘上有后土
祠封禪書曰元鼎四年始立后土祠於汾陰睢丘
是也又有萬歲宮漢宣帝神爵元年幸萬歲宮東
濟大河而神魚舞水矣昔趙簡子沈欒激於此曰
吾好聲色而是子致之吾好士六年不進一人是

過而點吾善君子以爲能譴矣

河水又逕郃陽城東

周威烈王之十七年魏文侯伐秦至鄭還築汾陰郃縣即此城也故有莘邑矣爲太姒之國詩云在郃之陽在渭之涘又曰纘汝維莘長子維行謂此也城北在北澆水南去二水各數里其水東逕其城內東入于河又於城南側中有澆水東南出城注于河城南又有澆水東流東注于河水南猶有文母廟前有碑去城一十五里水即郃水也縣取名焉故應劭曰在郃水之陽也河水又南澆水入

焉水出汾陰縣南四十里西去河三里平地開源潰泉上湧大幾如輪深則不測俗呼之爲澆魁古人壅其流以爲陂水種稻東西二百步南北一百餘步與郃陽澆水夾河中渚上又有一澆水皆相潛通故呂忱曰爾雅異出同流爲澆水其水西南流歷朔坂西西流注于河

河水又南逕陶城西

舜陶河濱皇甫士安以爲定陶不在此也然陶城在蒲坂城北城即舜所都也南去歷山不遠或耕或陶所在則可何必定陶方得爲陶也舜之陶也

斯或一焉孟津有陶河之稱蓋從此始之南對蒲
津關汲冢竹書紀年魏襄王七年秦王來見于蒲
坂關四月越王使公師隅來獻乘舟始罔及舟三
百箭五百萬犀角象齒焉

又南過蒲坂縣西

地理志曰縣故蒲也王莽更名蒲城應劭曰秦始皇
皇東巡見有長坂故加坂也孟康曰晉文公以賂
秦秦人還蒲於魏魏人喜曰蒲反矣故曰蒲反也
薛瓚注漢書曰秦世家以垣爲蒲反然則本非蒲
也皇甫謐曰舜所都也或言蒲坂或言平陽及澧

者也今城中有舜廟魏秦州刺史治太平遷都罷
州置河東郡郡多流離謂之徙民民有姓劉名墮
者宿擅工釀採挹河流醞成芳酎懸食同枯枝之
年排於桑落之辰故酒得其名矣然香醕之色清
白若滌漿焉別調氛氲不與佗同蘭薰麝越自成
馨逸方土之貢選最佳酌矣自王公庶友牽拂相
招者每云索郎有顧思同旅語索郎反語爲桑落
也更爲籍徵之雋句中書之英談郡南有歷山也
謂之歷觀舜所耕處也有舜井媯汭二水出焉南
曰媯水北曰汭水迺逕歷山下上有舜廟周處風

土記曰舊說舜葬上虞又記云耕於歷山而始寧
剡二縣界上舜所耕田於山下多柞樹吳越之間
名柞爲櫪故曰歷山余按周處此志爲不近情傳
疑則可證實非矣安可假木異名附山殊稱疆引
大舜即北寧懷更爲失誌記之本體差實錄之常
經矣歷山媯汭言是則安於彼乖矣尚書所謂釐
降二女於媯汭也孔安國曰居媯水之內王肅曰
媯汭虞地名皇甫謐曰納二女於媯水之汭馬季
長曰水所出曰汭然則汭似非水名而今見有二
水異源同歸渾流西注入于河

河水又南逕雷首山西

山臨大河北去蒲坂三十里尚書所謂壺口雷首
者俗亦謂之堯山山上有故城世又曰堯城闕駟
曰蒲坂堯都按地理志曰縣有堯山有祠雷首山
在南事有似而非非而是千載眇藐非所詳耳
又南涑水注之

水出河北縣雷首山縣北與蒲坂分山有夷齊廟
闕駟十三州志曰山一名獨頭山夷齊所隱也山
南有古冢陵栢蔚然攢茂丘阜俗謂之夷齊墓其
水也西南流亦曰雷水穆天子傳曰壬戌天子至

于雷首犬戎胡觴天子于雷首之阿乃獻良馬四六天子使孔牙受之于雷水之于是也昔趙盾田首山食祁彌明翳桑之下即於此也涑水又西南流注于河春秋左傳謂之涑川者也俗謂之陽安澗水又南至華陰潼關渭水從西來注之

汲冢竹書紀年曰晉惠公十五年秦穆公帥師送公子重耳涉自河曲春秋左氏僖公二十四年秦伯納之及河子犯以璧授公子曰臣負羈縻從君巡於天下臣之罪多矣臣猶知之而况君乎請由此亡公子曰所不與舅氏同心者有如白水授璧

於此子推哭曰天開公子子犯以爲功吾不忍與同位遂逃焉

河水歷船司空與渭水會

漢書地理志曰舊京兆郡之屬縣也左丘明國語云華嶽本一山當河河水過而曲行河神巨靈手盪脚蹋開而爲兩今掌足之跡仍存華巖開山圖曰有巨靈胡者偏得神元之道能造山川出河所謂巨靈顛肩首冠靈山者也常有好事之人故升華嶽而觀厥跡焉自下廟歷列栢南行十一里東迴三里至中祠又西南出五里至南祠謂之北君

祠諸欲升山者至此皆祈請焉從北南入谷七里
又屆一祠謂之石養父母石龕木主存焉入南出
一里至天井井裁容人穴空迂迴傾曲而上可高
六丈餘山上又有微涓細水流入井中亦不甚沾
人上者皆所由涉更無別路欲出井望空視明如
在室窺窓也出井東南行二里峻坂斗上斗下降
此坂二里許又復東上百丈崖升降皆須扳繩挽
葛而行矣南上四里路到石壁緣傍稍進逕一百
餘步自此西南出六里又至一神名曰胡趨寺神
像有童子之容從祠南歷夾嶺廣裁三尺餘兩箱

崖數萬仞窺不見底祀祠有感則雲與之平也然
後敢度猶須騎嶺抽身漸以就進故世謂斯嶺爲
搦嶺矣度此二里復屆山頂上方七里靈泉二所
一名蒲池西流注于澗一名太上泉東注澗下上
宮神廟近東北隅其中塞實雜物事難詳載自上
宮東北出四百五十步有屈嶺東南望巨靈手跡
唯見洪崖赤壁而已都無山下上觀之分均矣河
在關內南流潼激關山因謂之潼關灌水注之水
出松果之上北流逕通谷世亦謂之通谷水東北
注于河述征記所謂潼谷水者也或說因水以名

地也河水自潼關東北流水側有長坂謂之黃巷
坂傍絕澗涉此坂以升潼關所謂沂黃卷以濟潼
關矣歷北出東嶠通謂之函谷關也邃岸天高空
谷幽深澗道之峽車不方軌號曰天嶮故西京賦
曰巖嶮周固衿帶易守所謂秦得百二并吞諸侯
也是以王元說隗囂曰請以一丸泥東封函谷關
圖王不成其弊足霸矣郭緣生記曰漢末之亂魏
武征韓遂馬超連兵此地今際河之西有曹公壘
道來原上云李典營義熙十三年王師曾據此壘
西征記曰汭路逶迤入函道六里舊城城周百餘

步北臨大河南對高山姚氏置關以守峽宋武王
入長安檀道濟王鎮惡或據山爲營或平城結壘
爲大小七營濱帶河嶮姚氏亦保據山原阜之上
尚傳故跡矣關之直北隔河有層阜巍然獨秀孤
峙河陽世謂之風陵戴延之之所謂風埽者也南
則河濱姚氏之營與晉對岸

河水又東北玉澗水注之

水南出玉溪北流逕皇天原西周固記開山東首
上平博方可里餘三面壁立高千許仞漢世祭天
於其上名之爲皇天原上有漢武帝思子臺又北

逕閿鄉城西郡國志曰弘農湖縣有閿鄉 世謂之閿鄉水也魏尚書僕射閿鄉侯河東衛伯儒之故邑其水北流注于河

河水又東逕閿鄉侯河東與全鳩澗水合

水出南山北逕皇天原東述征記曰全節地名也其西名桃原古之桃林周武王克殷休牛之地矣西征賦曰咸徵名於桃園者也晉太康地記曰桃林在閿鄉南谷中其水入北河注于河

又東過河北縣南

縣與湖縣分河蓼水出襄山蓼谷西南流于河

河水又東永樂澗水注之

水北出于薄山南流逕河北縣故城西故魏國也

晉獻公滅魏以封畢萬卜偃曰魏大名也萬後其

昌乎後乃縣之在河之北故曰河北縣也今城南

西二面並去大河可二十餘里北去首山一十許

里處河山之間土地迫隘故魏風著十畝之詩也

城內有龍泉南流出城又南斷而不流永樂溪水

又南入于河余按中經即渠豬之水也太史公封

禪書稱華山以西名山七薄山有其一焉薄山即

襄山也徐廣曰蒲坂縣有襄山山海經曰蒲山之

首曰甘桑之山共水出焉而西流注于河東則渠
豬之山渠豬之水出焉而南流注于河如淮封禪
書二水無西南流河之理今診蓼水川流所趣與
共水相扶永樂溪水導源注于河又與渠豬勢合
蒲山統目總稱亦與襄山不殊故楊雄河東賦曰
河靈攬踢掌華蹈襄注云襄山在潼關北十餘里
以是推之知襄山在蒲坂蓼水即渠豬之水也
河水自河北城南東逕芮城

二城之中有段干木塚干木晉之賢人也魏文侯
過其門軾其廬所謂德尊萬古芳越來今矣汲冢

竹書紀年曰晉武功元年尚一軍芮人乘京荀人
董伯皆叛匪直大荔故芮也此亦有焉紀年又云
晉武公七年芮伯萬之母芮姜逐萬萬出奔魏八
年周師虢師圍魏取芮伯萬而東之九年戎人逆
芮伯萬于邲斯城亦或伯萬之故畫也

河水又會槃澗

水出湖縣夸父山北逕漢武帝思子宮歸來望子
臺東又北流入于河

河水又東逕湖縣故城北

昔范叔入關遇穰侯於此矣湖水出桃林塞之夸

父山廣員三百仞武王伐紂天下既定王及嶽濱
放馬華陽散牛桃林即此處也其中多野馬造父
於此得驊騮綠耳盜驪之乘以獻周穆王使之馭
以見西王母湖水又北逕湖縣東而北流入于河
魏土地記曰弘農湖縣有軒轅黃帝登仙處黃帝
採首山之銅鑄鼎於荆山之下有龍垂胡於鼎黃
帝登龍從登者七十人遂昇於天故名其地爲鼎
湖荆山在馮翊首山在蒲坂與湖縣相連晉書地
道記太康記並言胡縣也漢武帝改作湖俗云黃
帝自此乘龍上天也地理志曰京兆湖縣有周天

子祠二所故曰湖不言黃帝升龍也山海經曰西
九十里曰夸父之山其木多欒柎多竹箭其陽多
玉其陰多鐵其北有林焉名曰桃林其中多馬湖
水出焉北流注于河故三秦記曰桃林塞在長安
東四百里若有軍馬經過好行則牧華山休息林
下惡行則決河漫延人馬不得過矣

河水又東合柏谷水

水出弘農縣兩石隄山山下有石隄祠銘云魏甘
露四年散騎常侍征南將軍豫州刺史領弘農太
守南平公之所經建也其水北流逕其亭下昔公

子重耳出亡及栢谷卜適齊楚狐偃曰不如之翟
漢武帝嘗微行此亭見饋亭長妻故潘岳西征賦
曰長徵客於栢谷妻覩貌而獻餐謂此亭也谷水
又北流入于河

河水又東右合門水

門水即洛水之支流者也洛水自上洛縣東北於
拒城之西北分爲二水枝渠東北出爲門水也門
水又東北歷陽華之山即華陽山海經所謂陽華
之山門水出焉者也又東北歷峽謂之鴻關水東
有城即關亭也水西有堡謂之鴻關島世亦謂之

劉項裂地處非也余按上洛有鴻臚圍池是水津
渠泂注故謂斯川爲鴻臚澗鴻關之名乃起是矣
門水又東北歷邑川燭水注之左水出于陽華之
陽 東北流逕盛墻亭西東北流與右水合右水
出陽華之陰東北流逕盛墻亭東北與左水合即
山海經所謂緒茹之水出于陽華之陰東北流注
于門水者也又東北燭水注之水有二源左水南
出于衡嶺世謂之石城山其水東北流逕石城西
東北合右水右水出石城山東北逕石城東北入左
水地理志曰燭水出衡嶺下谷開山圖曰衡山在

函谷山西南是水亂流東注于緒茹之水二水悉得通稱矣歷澗東北出謂之開方口水側有阜名之方伯堆宋奮武將軍魯方平建威將軍薛安都等與建威將軍柳元景北入軍次方伯堆者也堆上有城即方伯所築也又東北逕入川城南即漢封竇門之故邑川受其名亦曰竇門城在函谷關南七里又東北田渠川水注之出衡山之白石谷東北流逕故丘亭東是薛安都軍所從城也其水又逕鹿蹄山西山石之上有鹿蹄自然成者非人功所刊歷田渠川謂之田渠水西北流注于燭水

燭水又北入門水水之左右即函谷山也門水又北逕弘農縣故城東城即故函谷關校尉舊治處也終軍棄繻於此燕丹孟嘗亦義動雞鳴於其下可謂深心有感志誠難奪矣昔老子西入關尹喜望氣於此也故趙至與嵇茂齊書曰李叟入秦及關而歎亦言與嵇叔夜書及關尹望氣之所異說紛綸並未知所定矣漢武帝元鼎四年徙關於新安縣以故關爲弘農縣弘農郡治王莽更名右隊劉桓公爲郡虎相隨渡河光武聞而善之其水側城北流而注于河河水於此有洹津之名說者咸

云漢武微行柏谷遇辱竇門又感其妻深識之饋
既返玉階厚賞賚焉賜以河津令其鬻渡今竇津
者是也故潘岳西征賦酬匹婦其已泰胡厥夫之
謬官表豹之徒並以爲然余按河之南畔夾側水
濱有測謂之涇津河北縣有涇水涇津其水南入
於河河水故有涇津之名不從門始蓋事類名同
故作者是之竹書穆天子傳曰天子自賓軫乃次
于涇水之陽丁亥入于南鄭考其泂歷所鍾路直
斯津以是推之知非因門矣俗或謂之偃鄉澗水
也河水又在左右一水其水三源疏引俱導薄水

南流會成一川其三水之內世謂之閑原言虞芮
所爭之田所未詳矣又南注于河河水右會水注
之水出南山北逕曹陽亭西陳涉遣周章入秦少
符章邯斬之於此魏氏以爲好陽晉書地道記曰
亭在弘農縣東十三里其水西北流入于河河水
又東蓄水注之水出常烝之山西北逕曲沃城南
又屈逕其城西西北入河諸注述者咸言曲沃在
北此非也魏司徒崔浩以爲曲沃地名也余按春
秋文公十三年晉侯使詹嘉守桃林之塞處此以
備秦時以曲沃之官守之故曲沃之名遂爲積古

之傳矣河水又東得七里澗澗在陝西七里故因名焉谷水自南山通河亦謂之曹陽坑是以潘岳西征賦曰行於漫瀆之口憩於曹陽之墟袁豹崔浩亦不非其地矣余按漢書昔獻帝東遷逼以寇難李傕郭汜追戰于弘農澗天子遂露次曹陽楊奉董丞外與傕和內引白波李樂等破傕乘輿於是得進復來戰奉等大敗兵相連綴四十餘里方得達陝以是推之似非曹陽然以山海經曰求之菑曹字相類是或有曹陽之名也河水東合譙譙水導源常烝之山俗謂之爲于山蓋先後之異名也

山在陝城南八十里其川流也二源雙導同注一壑而西北流注于河

又東過陝縣北

橐水出橐山西北流又有于水出南山北合逕崖峽北流與于山之水會出于山東谷兩川合注于崖水又東北注橐水北流出谷謂之漫澗矣與安陽溪水合水出石嶠南西逕安陽城南漢武帝封上官桀爲侯國也潘岳所謂我祖安陽也東合漫澗水北有逆旅亭謂之漫口客舍也

又西逕陝縣故城南

又合一水謂之瀆谷水南出近溪北流注橐其水
又西北逕陝城西西北入于河河北對茅城故茅
亭茅戎邑也公羊曰晉敗之大陽者也津亦取名
焉春秋文公三年秦伯伐晉自茅津濟封峭尸而
還是也東則咸陽澗水注之水出北虞山南至陝
津注河河南即陝城也昔周邵分伯以此城爲東
西之別東城即虢邑之上陽也虢仲之所都爲南
虢三虢此其一焉其大城中有小城故焦國也武
王以封神農之後於此王莽更名黃眉矣戴延之
云城南倚山原北臨黃河縣水百餘仞臨之者咸

悚惕焉西北帶河水湧起方數十丈有物居水中
父老云銅翁仲所投處又云石虎載經於此沈沒
二物並存水所以湧所未詳也或云翁仲頭髻常
出水之漲減恒與水齊晉軍當至髻不復出今唯
見水異耳嗟嗟有聲聲聞數里按秦始皇二十一
年長狄十二見於臨洮長五丈餘以爲善祥鑄金
人十二以象之各重二十四萬斤坐之宮門之前
謂之金狄皆銘其胸云皇帝二十六年初兼天下
以爲郡縣正法律同度量大人來見臨洮身長五
丈足六尺李斯書也故衛恒敘篆曰秦之李斯號

爲工篆諸山及銅山銘皆斯書也漢自防房徙之
未央前俗謂之翁仲矣地皇二年王莽夢銅人泣
惡之念銅人銘有皇帝初兼天下文使尚方工鑄
滅所夢銅人膺文後董卓毀其九爲錢其在者三
魏明帝欲徙之洛陽重不可勝至霸水西停之漢
晉春秋曰或言金狄泣故留之石虎取置鄴宮付
堅又徙之長安毀二爲錢其一未至而付堅亂百
姓推置陝北河中於是金狄滅除以爲鴻河巨瀆
故應不爲細梗躓湍流長津碩浪無宜以微物屯
流斯水之所以濤波者蓋史記所云魏文侯二十

六年虢山崩壅河所致耳獻帝東遷自夕潛渡墜
坑爭舟舟指可掬亦是處矣

又東過大陽縣南

交澗水出吳山東南流入河河水又東路澗水亦
出吳山東逕大陽城西西南流注水入于河

河水又東逕大陽縣故城南

竹書紀年曰晉獻公十有九年獻公會虞師伐虢
滅下陽虢公醜奔衛獻公命瑕父呂甥邑于虢都
地理志曰北虢也有天子廟王莽更名勤田應劭
地理風俗記城南大河之陽也

河水又東沙澗水注之

北出虞山東南逕傅巖歷傅說隱室前俗名之爲聖人窟孔安國傳傅說隱於虞號之間即此處也傅巖東北十餘里即巖幹坂也春秋左傳所謂入自巖幹者也有東西絕澗左右幽空窮深地壑中則築以成道指南北之路謂之爲幹橋也傅說傭隱止息於此高宗求夢得之是矣橋之東北有虞原上道東有虞城堯妻舜以嬪于虞者也周武王以封太伯弟虞仲於此是爲虞公太原地記所謂北虞也城東有山世謂之五家家冢上有虞公廟

春秋穀梁傳曰晉獻公將伐虢荀息曰君何不以屈產之乘垂棘之璧假道於虞公曰此晉國之寶也曰是取中府置外府也公從之及取虢滅虞乃牽馬操璧璧則猶故馬齒長矣即宮之奇所以謂虞號其猶輔車相依唇亡則齒寒虢亡虞亦亡矣其城北對長坂二十許里謂之虞坂戴延之曰自上及下七山相重戰國策曰昔騏驎駕鹽車上於虞坂遷延負轅而不能進此蓋其困處也橋水東北山溪中有小水西南流沙澗亂流逕太陽城東北河北郡治也澗水南流逕注于河河水又東左右

合積石土柱二溪並北發太陽之山南流入于河
是山也亦通謂之爲薄山矣故穆天子傳曰天子
自鹽巴丑南登于薄竇軫之陞乃宿于虞是也

又東過砥柱間

砥柱山名也昔禹治洪水山陵當水者鑿之故破
山以通河河水分流包山而過山見水中若柱然
故曰砥柱也三穿既決水流踈分指狀表目亦謂
之三門矣山在虢城東北太陽城東也搜神記稱
齊景公渡于江沈之河鼃銜左驂沒之衆皆惕古
冶子於是拔劍從之邪行五里逆行三里至于砥

柱之下乃鼃也左手持鼃頭右手挾左驂燕躍鵠
踴而出仰天大呼水爲逆流三百步觀者皆以爲
河伯也亦或作江沅字子者也若因地而爲名則宜
在蜀及長沙按春秋此二土並景公之所不至古
冶子亦無因而騁其勇矣劉向敘晏子春秋稱古
冶子曰吾嘗濟於河鼃銜左驂以入砥柱之流當
是時也從而殺之視之乃鼃也不言江沅矣又考
史遷記云景公十二年公見晉平公十八年復見
晉昭公旌軒所指路古斯津從鼃砥柱事或在茲
又云觀者以爲河伯駭於江沅之證河伯本非江

神又河可知也

河之右則嶠水注之

出河南盤嶠山西北流水上有梁俗謂之鴨橋也
歷澗水東北流與石嶠水合水出石嶠山山有二
陵南陵夏后臯之墓也北陵文王所避風雨矣言
山徑委深峯阜交陰故可以避風雨也秦將襲鄭
蹇叔致諫而公辭焉蹇叔哭子曰吾見其出不見
其入晉人禦師必於嶠矣余收爾骨焉孟明果覆
秦師於此嶠水又北左右合西水亂流注于河
河水又東千嶠之水注焉

水南導於千嶠之山其水北流纏絡二道漢建安
中曹公西討巴漢惡南嶠之嶮故更開北道自後
行旅率多從之今山側開路有石銘云晉太康三
年弘農太守梁抑修復舊道太嶠以東西嶠以西
明非一嶠也西有二石又南五六十步臨溪有恬
漠先生翼神碑蓋隱斯山也其水北流注于河河
水翼岸夾山巍峯岐舉羣山疊秀重嶺干霄鄭玄
按地說河水東流貫砥柱觸闕流今世所謂砥柱
者蓋乃闕流也砥柱當在西河未詳也余按鄭玄
所說非自西河當無山以礙之自砥柱以下五戶

已上其間一百二十里河水竦石桀出勢連襄陸
蓋亦禹鑿以通河疑此闕流也其山雖闢尚梗湍
流激石雲洄濼波怒溢合有一十九灘水流迅急
勢同三峽破害舟船自古所患漢鴻嘉四年楊焉
言從河上下患砥柱隘可鑄廣之上乃令焉鑄之
裁沒水中不能復去而令水益湍怒害甚平日魏
景初二年二月帝遣都督沙兵部監運諫議大夫
寇茲帥五千人歲常修治平河岨晉秦始皇三年
正月武帝遣監運太中大夫趙國都匠中郎將河
東樂世帥衆五千餘人修治河灘事見五戶祠銘

雖世代加功水流湍洿濤波尚屯及其商舟是次
鮮不踟躕難濟故有衆峽諸灘之言五戶灘名也
有神祠通謂之五戶將軍亦不知所以也

又東過平陰縣北又東至鄧清水從西北來注之

清水出清廡山之西嶺世亦謂清營山其水東南
流出峽峽左有城蓋古關防也清水歷其南東流
逕臯落城北服虔曰赤翟之都也世謂之倚亳城
蓋讀聲近傳因失實也春秋左傳所謂晉僕使太
子申生伐東山臯落氏者也與倚亳川水合水出
北山礦谷東南流注于清清水又東逕清廡城南

又東南流又會南溪溪水出南山而東注清水又東合棗澗水水出左人嶺下南流俗謂之扶蘇水又南歷麩苗北馬頭山赤曰白水原西南逕垣縣故城北史記魏武侯二年城安邑至垣即是縣也其水西南入清水色白濁初會清流流注乃有玄素之異也清水又東南逕陽壺城東即垣縣之壺城東即垣縣之壺丘亭晉遷宋五大夫所居也清水又東南流注于河

河水又東與教水合

出垣縣北教山南逕輔山高二十許里上有泉不

測其深頂山周員五六里少草木山海經曰孟門東南有平山水出于其上潛于其下又是王屋之次疑即平山也其水南流歷鼓鍾上峽懸洪五丈飛流注壑夾岸深高壁立直上經崖秀舉百有餘丈峯次青松巖懸頽石於中歷落有翠栢生焉丹青綺分望若圖繡矣水廣一十許步南流歷鼓鍾川分爲二澗一澗西北出一百六十許里山岫迴咀纔通馬步今聞喜縣東北谷口猶有乾河里故溝存焉今無復有水一水歷冶官西世人謂之鼓鍾城城之左右猶有遺銅及銅錢也城西阜下有

大泉西流注澗與教水合伏入石下南至下峽山
海經曰鼓鍾之山帝臺之所以觴百神即是山也
其水重源雙發南至西馬頭山東載坡下又伏流
南十餘里復出又謂之伏流水南入于河山海經
曰教山教水出焉又南流注于河是水冬乾夏流
實惟乾河也今世人猶謂之爲乾澗矣

河水又與畛水合

水出新安縣青要山今謂之疆山山海經曰河長
澗水北流入于河山海經曰青要之山畛水出焉
即是水也河水又東正田之水入焉水出驪山疆

山東阜也東流俗謂之疆川水與石等瓜川合出
西北石澗中東南流注于疆水疆水又東逕疆冶
鐵官東東北流注于河

河水又東合庸庸之水

水出河南垣縣宜蘇山俗謂之長泉水山海經曰
水多黃貝伊洛門也其水北流分爲二水一水北
入河一水又東北流注于河

河水又東逕平陰縣北

地理風俗記曰河南平陰縣故晉陰地陰戎之所
居又曰在平城之南故曰平陰也三老董公說高

祖處陸機所謂皤皤董叟謨我平陰者也魏文帝
改曰河陰矣

河水西會溱水

一作
右會

水出垣縣王屋西山溱溪夾山東南流逕故城東
卽溱關也漢光武建武二年遣司空王梁北守溱
關天井關擊赤眉別校皆降之獻帝自陝北渡安
邑東出溱關卽是關也溱水西屈逕關城南歷軹
關南逕苗亭西亭故周之苗邑也又東流注于河
經書清水井也是乃溱水耳

水經第四

